

Q U Æ S T I O
AN PRINCEPS LEGIBUS SIT
S O L U T U S ;

Explicata

A B

ANDREA SCHEPSIO J. U. D.

cum

IN INCLYTA MARPVRGENSI
Academia

à

MAGNIFICO ET

CLARISS. VIRO Dn. PHILIPPO

MATTHÆO J. U. D. & Professore, ac

pro tempore Rectore &

promotore,

PUBLICÆ

JURIS UTRIVSQUE DO-

ctor renunciaretur,

xxiii. die Augusti.

ADDITAE SVNT IN FINE THESES AB EODEM

pro consequendo Doctoratus gradu publice propo-
sita & defensa.




MARPURGI CATTORUM,

Excudebat Paulus Egenolphus. Anno Christi

MDLXCVI.

K



MAGNIFICIS, STRENUIS AC
Nobilissimis, sapientia, eruditione, virtute,
pietate, & dignitate, amplissimis, spectatissi-
simisq; viris, Dn. Præfecto, Dominis Con-
sulibus, & Senatoribus Inclytæ Reipublicæ
Vratislaviensis.




IN EADEM ILLVSTRI REPUBLICA
*Patritijs nobilissimis & celebratissimis, Dn. SIGISMUNDO ET
CHRISTOPHORO UTHMANNIS à Schmoltz, in Lambsfeld, &
Rosenthal, ceterisq; eiusdem Nobilis, vetusta, & laudatissima fa-
milia Uthmannica Agnatis & Cognatis:*

Dominis ac Mæcenatibus suis beneficis, perpetuæq; gra-
titudinis & reverentiæ cultu prosequendis, colendisq;:

Suam quæstionem de summi Principis jure, thesesque
miscellaneas ex jure Romano passim desumptas, donec
Deus, fons omnis juris, aliquantò post benignè largia-
tur majora:

Offert & dicat:

Andreas Scheps,
J. U. D.



Q U A E S T I O

A B

I N G E N U O O P T I M A E Q U E S P E I P U E R O , F I L I O M A G N I F I C I E T

Clarissimi Viri Dn. Philippi Matthæi J. u. D. &
Academiae Rectoris proposita.



*Nec varias quaestiones variè à Jureconsultis disputatas
vel primum sibi vindicat locum illa quaestio: An prin-
ceps legibus sit solutus nec ne? Quam in prasensi
moverelites. Affirmativam verò eius quaestionis sen-
tentiam Dn. Candidatus nuper in publica disputatione,
pro Doctoratus gradu jam jam consequendo, insituta, amplectebatur,
atq; num etiam, ut puto, amplectitur. Multa verò sunt, quae illi sen-
tentiae resistunt, quaeq; efficiunt, quò minus primo statim aspectu sub-
scribere eidem possim.*

*An non enim haec sententia bipatentes fenestras tyrannidi patefa-
cis? Equidem qui à legum obligatione Principem absolvit, quid quaso
aliud facit, quam ut bonum etiam Principis animum, ad illicita quaeq;
totius Imperij cum dedecore sentanda, incitet? Leges quippe honesta-
rum actionum & virtutum omnium metasunt: quam si egredi liceat
Principi, utiq; id eidem agere licebit, quod rationi, quod honestati, quod
deniq; virtuti repugnet. Ut enim intra metam à legibus praescriptam
omnia sunt honesta, ita extra eandem omnia honestati repugnant.*

*Deinde, an non haec ipsa sententia seditionis fecundissima parens est?
Ponamus enim Principem legibus esse solutum: dicamus, secundum le-
ges vivere eum non compelli: statuamus, posse eum sua pro libidine con-
tra leges facere quod vult: quid sequetur? Inobedientia subditorum, fre-
mitus contra Principem, calamitas, & extrema imperij destructio. Vi-*

A a dentes

identes enim subditi, omnia licere Principi, seq̃, per idipsum à Principe negligi, pro amore, quo completi debebant Principem odium concipier̃. obsequium insuper infremitus & seditiosos conatus convertetur.

Præterea, si interficere licet tyrannum, quis credat Principem legibus solutum esse? Si enim iusta & licita est tyranni interfectio, præcessit eam in iustum tyranni factum & crimen: si crimen præcessit, verum est, tyrannum delinquere: si delinquit, falsum profectò, legibus cum non ligari. Is enim delinquit, qui facit, quod per leges facere nequit. At qui legibus est solutus, quicquid faciat, perinde est: dicitur, de facto illo nequit, id vel contra vel secundum leges factum esse. Aut ergo Princeps legibus solutus non est, aut si solutus est, propter tyrannidem interfici nequit.

Ad hæc si ex potestatis plenitudine Princeps subditis bona auferre nequit, falsum profectò est, legibus cum nō teneri: eum si non teneretur, bona pro arbitrio auferre subditis posset.

Si insuper Augusta, Ulpiano teste, legibus soluta non est, cur Augustum legibus solutum dicemus: maximè cum illa etiam maiestate, legesq̃, condendi potestate pradita esse videatur. Quod vel Theodora Justiniani Imperatoris Augusta exemplo probari potest: quam in consilium adhibuit Justinianus legē laturus: ut ex Nov. 8. c. 1. in pr. apparet.

Quid multis? Si naturalibus & gentium legibus Princeps solutus non est, nullis omnino legibus solutus meritò dicitur: Civiles quippe leges ex naturalibus sunt compositæ.

Moveor etiam in inscriptione l. 32. ff. de ll. ex qua, si ullis legibus solutum esse Principem dici oportet, dicerem eum Cuiacio, de caducariis legibus intelligi id debere.

Moveor non minus l. 3. C. de testam. ex qua, si Cuiacj̃ sententia nodum fortè non solvit, dicerem eum Donello, Corasso & aliis, solenni-
bus iuris Principem non teneri.

Moveor item l. ex imperfecto 23. ff. de legat. 3. ubi Paulus, Principem legibus solutum videri dicit: Aliud verò est, solutum videri, & reverà solutum esse.

Moveor

5
*Moveor deniq; omnium maximè l. 4. C. de l. l. 3. C. de testamenti
ubi ipsi Imperatores, juxta leges se vivere, fatentur. Minimè verò
id faterentur, minimè juxta leges viverent si legibus soluti essent.*

*Hic dubitandi rationibus ubi satisfeceris Dn. Candidasus, su-
amq; simul sententiam evidentibus argumentis con-
firmaveris, legibus solutum esse Prin-
cipem, credam.*



R E S P O N S I O.



P S T ita, ut audivistis, Magnifice Domine Rector,
Reverende & Nobilissime Ordinis Teutonici Con-
mendator, Amplissime Domine Procæcellarie, Re-
verendi Clarissimi, Consultissimi, Prudentissimi &
præstantissimi viri, Domini, Præceptores, Patroni &
fautores observandi, tuque nobilissima & præstantissima studio-
se juventutis corona. Difficilis & obscura est quæstio: *An
Princeps legibus sit solutus, nec ne?* Difficultatis & obscuritatis
causa una est obscuritas, cui majestatis jura ab omnibus penè
scriptoribus politicis involuta sunt. Obscuritas itaque obscu-
ritatem peperit. Sive enim Platonis, sive Aristotelis, sive alio-
rum, qui de republica deque imperiis in universum, in thesi vel
hypothesi, quicquam scripserunt, libros legamus, relegamus, vol-
vamus, evolvamus: neminem inveniemus, qui majestatem im-
perii vel definierit, nedum, qui plenè & perfectè eandem ex-
plicitur.

Solus, quod sciam, Bodinus, omnium politicorum ^{πολιτικῶν} 70, primus id effecit: solus is majestatis jura, à nemine definita definivit, à nemine explicata explicuit: quæq; Cymmertiis prius involuta erant tenebris, meridiano soli primus exposuit.

Bodinum ergo audiamus, & expedita erit sententia: *Principem omnimodo legibus solutum esse*: expedita itidem erunt eius sententiae fundamenta: facilis deniq; ad omnes omnium dissentientium objectiones erit responsio.

Utq; mihi pro Bodino loquenti, quæstionemq; propositam, sine Asiatica verborum prolixitate, sine Laconica item brevitate, explicanti, augustissimus hic confessus, numerosaq; ac præstantissima studiosæ juventutis corona benevolas accommodet aures, obnixè peto.

MAJESTATEM IMPERII ita definit Bodinus, *i. de republ. 8. in pr.* quòd sit potestas politica in cives & subditos, summa, perpetua, legibusque soluta: græcis ἀρχὴ ἐξουσία, καὶ εἰς ἀρχὴν, καὶ εἰς ὁλόν τε καὶ αἰῶνα, Latinis absoluta potestas, absoluta jurisdictio, potestatis plenitudo, eodem sensu dicta.

Brevis est definitio, sed eiusmodi, ut ex ea, quoniam argumento, Principem legibus solutum esse, probare velim, quilibet animadvertere jamdudum possit.

Si enim est aliqua Imperii majestas legibus soluta: quidni & Principes majestate illa præditi legibus soluti sint? Tantum ergo probabo, esse aliquam potestatem SUMMAM, PERPETUAM, LEGIBUSQUE SOLUTAM; & probata erunt omnia.

SUMMA POTESTAS, est potestas illa, quæ post Dei immortalis potestatem inter homines seipsa majorem non agnoscit. Etenim multæ in quolibet imperio sunt potestates, imperia multa: una verò illarum potestatum semper est prima, quæ summam hinc nomino. Exemplo sit imperium Romanum. Est & fuit in eo imperio inde à primis eius incunabulis potestas patria, potestas maritalis. Fuit in eodem imperio quondam alia potestas

potestas magistratus urbani majoris, in Democratico quidem statu, Senatorum, Tribuni plebis, Prætorum: in Monarchico statu, Præfecti prætorio, Comitibus sacrarum largitionum, Comitibus rerum privatarum, comitibus sacri patrimonii, Magistri militum, Magistri officiorum. Fuit insuper alia potestas magistratus urbani minoris, utpote Quæstoris, Præfecti annonæ, Præfecti vigilum. Fuit præterea potestas alia provincialis magistratus, in Democratico statu Proconsulis, Proconsulis legati: in Monarchico statu, Præsidis provinciæ, Vicarii, Præfecti augustalis, Juridici Alexandriæ, Rectoris provinciæ, Procuratoris Cæsaris, Procuratoris domus, Procuratoris rei domesticæ. Fuit denique alia potestas magistratus municipalis, Curia puta, Decurionum, Duumvirorum, Defensorum. Est in eodem imperio adhuc hodie, à Caroli M. temporibus, alia potestas Archiepiscoporum, Episcoporum, Abbatum, Abbatissarum. Est item alia potestas Ducum, Principum, Marchionum, Landtgraviorum, Comitum Palatinorum, Comitum, Baronum, Nobilium, Civitarum denique omnium, quotquot Romanogermanico imperio mediatè vel immediatè sunt subiectæ. Harum verò potestatum omnium aliqua semper fuit prima, earundem procreatrix, conservatrix & gubernatrix, atque nunc etiam est. Senatores enim, Prætores, Proconsules, Proconsulum legatos, Decuriones, creavit, conservavit, & gubernavit in democratico statu Populus. Præfectos prætorio, *si Dioni lib. 55. in pr. si Suetonio in vita Augusti c. 37. si Victori Aureliano, si denique alijs credimus*, creavit, conservavit & gubernavit Augustus: conservarunt & gubernarunt eosdem Imperatores reliqui. Præfectos urbi, *si Fenestella c. 6. de magistratibus Romanis, si Eberlino c. 31. de O. I. si denique alijs fidem habemus*, crearunt, conservarunt, & gubernarunt in regio statu reges: conservavit & gubernavit eosdem in democratico statu populus: conservarunt denique & gubernarunt eosdem in Imperatorio statu, Julius Cæsar, Augustus, & Imperatores reliqui. Magistros militum porro, creavit, con-

servavit, & gubernavit Constantinus: conservarunt & gubernarunt eisdem Constantios, Julianus, Jovianus, Valentinianus, & reliqui Imperatores Constantinum secuti. Ac, ne in enumeranda Magistratuum Romanorum omnium origine nimis sim prolixus, Archiepiscopos, Episcopos, Abbates, Abbatissas, Duces, Principes, Marchiones, Ladigravios, Comites palatinos, Comites, Barones, creavit, cōservavit, & gubernavit primus omnium Carolus Magnus: conservarunt & gubernarunt eisdem reliqui Imperatores invictissimi Carolum Magnū secuti: eisdemq; totumq; adeo Romanogermanicum hoc imperium, invictissimus ac clementissimus, Imperator noster **RUDOLPHUS II**, adhuc hodie clementer conservat & gubernat, maximisq; militum copiis adversus Turcicam tyrannidem defendit & propugnat. Talisq; in universum cuiuslibet magistratus potestas semper fuit, atque num etiam est, qualem eam procreans & conservans esse voluit. Si cui iurisdictio sola esset concessa, hac sola utebatur: si cum iurisditione simul concessum alicui esset imperium, utebatur & hoc, saltem in causis ad iurisditionem suam pertinentibus, inter personas iurisditioni sue subiectas, & deniq; in loco ac territorio sibi definito. Idque est, quod *in l. 2. in pr. ff. si quis in ius. voc. nov. ier. l. 3. in pr. ff. de postulan. l. 16. §. 5. ff. de minorib.* dicitur: *magistratum secundum suam iurisditionem, vel quod idem est, secundum modum iurisditionis sue iudicare & ius dicere debere.* Id etiam est, quod *in l. fin. ff. de iurisdict.* dicitur: *extra territorium ius dicenti impune non pareri, idemq; esse, si supra iurisditionem suam dicere ius velit.* Id deniq; est, quod *in l. 8. ff. de calumniis. l. 78. §. 1. ff. de leg. 3. l. 5. pr. ff. de re iud. l. 3. C. pro soc. l. 6. C. de excus. ius. l. 4. C. de distract. pign.* & alibi extat: cum tandem magistratum iudicare & ius dicere debere, cuius ea de re notio est. Neq; aliter fieri oportuit, aut num etiam potest. Ut enim totum hoc *καλὸν πρῶτον*, sine potentissima Dei omnipotentis creatione non extitit, seq; ipsum nō fecit: utq; per se ipsum, sine sapientissima eiusdem omnipotentis Dei gubernatione,

tione tot retrò seculis non substitit, neque num etiam subsistit:
 ita varias in aliquo imperio potestates, sine summa & prima ali-
 cuius potestatis creatione, gubernatione, & conservatione, ex-
 sistere, aut subsistere, nulla ratio permittit. Ut præterea ani-
 mæ nostræ facultates gubernatrices actionum omnium, tum de-
 mum, uti par est, suo defunguntur officio, si intellectus, regis in-
 star, ad rerum quasi gubernacula sedens, clavumq; imperii tenēs,
 reliquis facultatibus præsit, iisdem imperet, facienda fieri jubeat,
 omittenda fieri vetet: si deinde voluntas, fidelissimi Cancellarii
 instar, intellectui adstet, eundemq; in quolibet negotio confir-
 met: si præterea affectus data sibi potestate amandi vel odio ha-
 bendi rem objectam, benè utantur: si denique locomotivæ, sub-
 ditorum instar, affectibus, tanquam legitimo suo magistratui, in
 primis verò intellectui, tanquam summo suo Principi, obtem-
 perent, idq; tantum aggrediantur, faciant, & executioni tradant,
 quod affectibus ordinatis, quòd item intellectui & voluntati cõ-
 sentaneum esse vident: ita in imperio quolibet tum demum be-
 nè & feliciter omnia geruntur, si summa aliqua sit potestas, quæ
 reliquas potestates omnes constituat, gubernet, augeat, minuat,
 proroget, abroget, subditosque in universum, tam præditos quã
 privatos potestate ordinaria, imperii splẽdore perfundat, & divi-
 na quasi majestate & autoritate obumbret, singulosq; clemen-
 ter regat & observet. Utq; vicissim totam hanc mundi machi-
 nam sapientissima Dei omnipotentis gubernatione destitutam
 perire, & ad nihilum redigi oportet: utque animam nostram
 suavissimo facultatum omnium concentu, ab intellectus impe-
 rio pendẽte, privatam, ad quævis scelera delabi, per eamq; in im-
 mensam miseriarum voraginem conjici hominem oportet: ita
 sine summa potestate, quodlibet imperium diu subsistere, & cy-
 clopicam anarchiam, in qua, velut in cyclopico antro, *videtur videri*
non, quod trito dicitur proverbio, audiat, diu evitare nequit. Idq;
 animadvertentes Legumlatores ethnici, Deos sese salutare & no-

minari voluerunt, tantum eo fine, ut apud eos, qui accepturi erant leges, maior ipsorum esset autoritas. Ita enim Persas Zoroastrem, Thebanos Mercurium, Aegyptios Trimegistum, Celtas Herculem, Cretenses Minocem, Carthaginienses Charondam, Lacedæmonios Lycurgum, Athenienses Draconem, Romanos Romulū, Italos Pythagoram, Locrenses Salucum, Siculos Platonē, aliosq; alios divinis affectis honoribus legimus. Utq; maior per omnia & in omnibus eū imperii tum legum latarū esset autoritas, illi ipsi Legulatores divinis affecti honoribus, potestatem suam Deo alicui tulere acceptam, alius quidē Jovi, alius Soli, alius Minervæ; & quidē vel Jovi, vel Soli, vel Minervæ tantum; nulli Deorum præterea. Quod ideo factū esse opinor, cum tribus illis numinibus tribuerent, ab hisq; peterent, quæ in Imperatore, in magistratu, in iudice desiderari viderent. Jovi enim clementiā, Soli potentiam, Minervæ sapientiam tribuebant. Quibus in Principe, in magistratu, in iudice concurrentibus, nihil est, quod desideretur amplius. Alii tamē Cererem prædictis numinibus annuere soliti sunt: fortē propter frugalitatē, quæ non modo Principē, magistratū, & iudicem valde commendat, sed & magnū imperii & reipublicę fulcrū esse solet, utpote cuius inter sit, ne quis re sua malē utatur. Quo illud Ovidii s. metamor. pertinet.

Prima Ceres unco glebas dimovit aratro:

Prima dedit fruges, alimentaq; mitia terris:

Prima dedit leges: Cereris sunt omnia munus.

Hæcq; veterum Ethnicorum consuetudo fuit. Quātō rectius verō, quantoq; meliori cum fundamento, Christiani Legumlatores, Imperatores, magistratus, & iudices Deos sese nominant, cum ipse Salvator noster eo illos nomine dignetur: dum inquit: *Iohan. 10. vers. 34: Dixi, vos dī estis.* Quā vocem ut ad magistratus omnes pertinet non diffitear: ad eos tamen, qui summa potestate præditi sunt, quiq; magistratibus ipsis præsunt, vel in primis pertinet. Hi enim verē Deo proximi, Deoq; simillimi.

Dei

Deiꝫ; vivens & spirans imago sunt, mediumq; inter Deū & homines locum obtinent, Deumq; solum imperare sibi patiuntur, homines verò universos, quorquot in Imperio sunt, obtemperare sibi jubent. Quis verò est, qui summam hanc potestatem habet? quis est, qui post Deum immortalem se maiorem videt neminem? quis est, qui post Deum immortalem subditus est nemini? quis est, qui rerum à se gestarum, nemini, præterquam immortalī Deo, rationem reddere cogitur? quis denique est, cui magistratus omnes, unà cum subditis omnibus sibi subiectis obtemperant? Est in Democratia Populus: est in Monarchia Imperator: sunt deniq; in Aristocratia Optimates. Tot ergo summæ sunt potestates, quot sunt imperia: tot item imperia sunt, quot sunt imperiorum formæ: formæ insuper imperiorum tot, quot imperandi modi. Etenim, aut unus imperat, estq; imperium monarchicum: aut imperant plures, estq; imperium aristocraticum: aut deniq; imperant omnes, estq; imperium democraticū. Quartus imperandi modus, quarta imperii forma, quartum deniq; imperium nullum est. Adeoq; unī etiam urbi nullis provinciis, nullisq; municipiis auct, suisq; tantum portis, pomœriis, & mœnibus conclusæ, summā potestatem, statumq; vel monarchicum, vel aristocraticum, vel deniq; democraticū tribuere possumus: urbisq; unius imperium à multarum urbium imperio quantitate sola differt: quoad formam differentia nulli est. Idq; intelligens quondam Eumenes, cum, fractis opibus, nihil præter arcem, in qua obsidebatur, suum dicere posset, iamque de pace inter ipsum & Antigonum Asiæ regem ageretur, ipseque Antigonus, ut potentia & opibus erat superior, sic etiam dignitate & potestate superior videri vellet, infracto animo legatis Antigonire spondit: Superiorem se neminem accepturum, quamdiu gladium exertum manū teneret: inuēns hoc ipso, summam potestatem neq; locorum spaciis, neq; regionum multitudine definiri: eandemq; sibi, unam arcē possidenti,

non minus quàm Antigono totius Asiæ domino competere: *Plutarchus in Eumene. Bodin. l. de republ. 9.* Estq; illa tantùm potestas summa, quæ simul est perpetua, legibusq; soluta. Si quæ verò potestas summa est non perpetua, legibusq; non soluta, ea videri quidem summa potest, verè tamen summa non est. Propria enim summæ potestatis effecta sunt: potestas perpetua: potestas legibus soluta: eidemq; in quolibet subiecto coherent, neq; separari ab eadem ulla ratione, ullòve modo, possunt. Ex quo id etiam est, ut integrales maiestatis partes rectè dicantur, potestas summa, potestas perpetua, potestas legibus soluta, adèd, ut quemadmodum integrum sine membris non est, quemadmodum homo sine anima, anima sine ratione, ratio sine harmonia, harmonia sine proportionè, proportio sine numero, numerus sine unitate, unitas sine termino, non est, quemadmodum insuper corpus humanum non est, si caput à trunco sit avulsum, quèadmodum deniq; manus non est, si digiti sint abscissi, ita etiam maiestas non sit, si una ex prædictis potestatibus desit. Neq; ergo Dictatorem Romanum, neque Harmosten Lacædæmoniorum, neque Esymnetum Thessalorum, neque Archonta Meliensium, neque Balam Florentinorum, summam potestatem habuisse quisquam dixerit; cum perpetuam potestatem nemo illorum habuerit: utcunque summa quorumlibet potestas videri potuerit, aut videri num etiam aliquibus possit. Romanorum equidem Dictatori, (ut de reliquis nihil dicam) perpetuum imperium non fuisse, omnia omnium historicorum monumenta comprobant: ex quibus hoc abundè probatur, non nisi improvisam necessitatem, puta belli gerendi, seditionis sedandæ, reipublicæ constituendæ, magistratus creandi, & si quæ sunt huiusmodi, omnem omninò Dictaturam peperisse. Ut ergo, existente necessitate, extitit Dictator, ita eadem necessitate intercidente, eius etiam imperium meritò unà intercidit, finemq; accepit. Neque hoc. solum argumento est, summam Dictatoris Romani potesta-

potestatem non fuisse, quia perpetua non fuit: sunt & alia. An non enim appellare à Dictatoris sententia licuit? Fabius equidē Maximus, Equitum Magister, cum à Papirio Dictatore capitis esset damnatus, ad Tribunos provocavit, ex eaq; provocatione populi iudicio liberatus est. Provocarunt & alii. Quid verò provocatio & appellatio ista præ se tulit? an non potestatem aliquam Dictatoris potestate maiorem? Ita profectò est. In eo enim omnis appellationis forma consistit, ut per eam à iudice inferiori ad superiorem judicem eatur. Si ergo dictator summam potestatem habuit, quomodo appellari ab eo potuit? quomodo ab eo tanquam à iudice inferiori ad superiorem judicem iri potuit? Aut, si appellare ab eo licuit, quomodo summa eius potestas fuit? Quamvis etiam initio Dictatores eo uterentur privilegio, ne ab ipsorum sententiis appellare cuiquam liceret, ne sic tamen summam potestatem tum eos habuisse, putandum est. Etsi enim, appellari ab aliquo non posse, per se summæ & absolutæ potestatis sive jurisdictionis effectum sit proprium, per accidens tamen, commune effectum jurisdictionis summæ, & jurisdictionis privilegiatæ, vel, quod idem est, specialiter concessæ, efficitur. Estque accidens illud, *privilegium*, sive *specialis concessio*, inter summum Principem, qui concedit, & magistratum, qui concessam accipit; ut relatio inter fundamentum & terminum existens. Quomodo & quo jure privilegiato à præfati prætorio sententiis appellare itidem non licebat: ut ex *l. un. ff. de off. præf. præf. l. un. C. de sent. præf. præf. l. 4. C. de precib. Imp. offer.* apparct. Idemque privilegium superioribus etiam seculis Electoribus Imperii, Regi scilicet Bohemiar, Archiepiscopo Moguntinensi, Trevirensi, Colonien si, Principi Saxoniar, Brandenburgico; & Palatino, invictissimæ memoriæ Carolus IV. Imperator tribuit, inter alia Aureæ suæ Bullæ capita constituens, ne ab ipsorum sententiis ad aliquod superius iudicium iretur. Quo ipso tamen privilegio, Cameræ iudicio postea per Maximilianum

I. W ormatia: Anno 1495. constituto, hodie, propter defuetudinē
 præteritam, pleriq; non uruntur. Quod si ergo illi ipsi Præfeti
 prætorio summam potestatem non habuerunt, ob id, quod ap-
 pellare ab illorum sententia nemini licebat, quod in integrum
 restitutionē nō nisi ab ipsis petere nemo poterat: quānam Dicta-
 tori hoc ipso argumento summam potestatem tribuere poterim-
 us? Verū enim vero objiciat aliquis: legitimam Dictatoris
 Romani jurisdictionem non fuisse? Fateor: idque ex Dionysio
 Halicarnassæo *lib. 10. antiq. Rom.* probari recorder: ubi Dictato-
 ribus *τοῦ μὲν ἀρχαῖ*, id est, legitimi magistratus opponuntur: quæ
 oppositio ratione careret, si Dictatorum jurisdictionem legiti-
 mam sive ordinariam fuisse cum ratione dici posset. Si
 ergo, inquiet aliquis porro, legitima Dictatoris jurisdictio non
 fuit, fuit absoluta & summa, hæc sola enim legitima opponitur?
 Concedo: sed inter absolutam potestatem, quæ verè, & quasi
 absoluta est, distinguo. Quasi absolutam, quasi summam po-
 testatem, habuit Dictator, utpote maiori potestate, legibus &
 tempore definitam, verè absolutam, verè summam, maioris
 scilicet potestatis, legum & temporis expertem non habuit.
 Siq̃ue uno dicendum est verbo, quidnam Romanorum Dicta-
 tor fuerit, Curatorem imperii cum fuisse, dico: imperatorem
 fuisse, nego. De magistratibus Romanis nihil dicam. Eos
 enim summam potestatem non habuisse, quilibet intelligit, &
 intelligit inde, cum ordinaria illorum potestas fuerit, populo
 scilicet in democratico, imperatoribus in monarchico imperii
 statu subordinata, quasiq̃ue substrata. Errantq̃ue vehemen-
 ter Polydorus Virgilius, *lib. 2. de inventorib. rer. c. 3. post pr.* Myn-
 fingerus in *5. Senatusconsult. 5. Inst. de l. n. g. c.* & alii, dum, imperan-
 tibus jusq̃; dicentibus Senatoribus Romanis, aristocraticū Ro-
 mani imperii statum fuisse, contendunt. Si enim id ita est, quo-
 modo penes Populum summa potestas remansit? Re-
 mansisse verò vel id argumento est, cum existente magistratu

Scna-

Senatorio, eodemq; rogante, leges Populus tulerit. Argumento præterea id etiam est, quòd moveri Senatu poterant, qui mori essent, moveri, inquam, non à Senatoribus reliquis, sed à Populo, & Censoribus Populi vicem gerentibus. Exemplo est C. Fabricius Censor, qui P. Cornelium Ruffinum, virum patritium, senatu amovit, quòd decem pondo argenti facti pro convivio apposuisset. Exemplo item est M. Cato Censor, qui C. Flamini fratrem Senatu eiecit, quòd exoratus à scorto, ut aliquè exilis, qui in vinculis erant, securi percuteret, obtemperasset. *Fenestella de magistratibus Romanis, c. 17.* Exemplo deniq; sunt alii: de quibus prolixè hic me disserere tempus non sinit. Quid multis? imperantibus Julio Cæsare, Augusto, Tiberio, Caligula, Nerone, Galba, Othone, Vitellio, Vespasiano, Tito, Domitiano, Nerva, Hadriano, D. Pio, M. Aelio Antonino & Vero, Severo, Caracalla, Heliogabalo, Alexandro, Maximino, Gordiano, Philippo, Decio, cæterisque Imperatoribus, monarchicum fuisse Romanì imperii statum, nemo unquam dubitavit. Penes Imperatores ergo summa fuit potestas: penes Senatum non fuit: utcumq; illorum etiam temporibus magnum huius esset decus, magna autoritas: usq; adeò, ut ipsi etiam Imperatores suum inter Senatores & Consules nomen profiterentur, subindeq; orationibus per Cãdidatos in Senatu recitatis, Senatores persuaderent, ut, quòd vellent, ipsi Senatus consulto firmarent. Quarum orationum exempla in l. cum hi, §. pr. ff. de transact. l. si & rem. 22. ff. de pet. hered. l. Divus Pius. 3. ff. de fugiervis. l. oratio. 16. ff. de sponsalibus. l. oratione. 16. l. si quis. 60. l. non solum. 67. §. 3. ff. de ritu nupt. l. cum hic status. 32. in pr. ff. de donat. inter vir. & ux. l. 1. ff. de reb. cor. qui sub tne. l. 1. §. 3. ff. ne de statu de funeli. l. certum 6. §. 2. ff. de confessis. l. post rem 56. ff. de re jud. l. estis. 9. C. de præd. minor. l. licet. 17. C. de excus. tut. l. 2. C. de curatore furiosi. l. pen. C. de his qua ut indign. l. fin. C. de testam. manumif. & passim in alijs legibus obvia sunt. Ac quis nescit, in Democratico etiam Romani im-

perii statu nullam nisi extraordinariam Senatorum iurisdictionē fuisse, in conjurationibus scilicet adversus rempublicam, inque aliis criminibus publicum statum concernentibus, & deniq; in casibus, in quibus Populus cognitionem habens ad Senatum eadem referebat? Quis item nescit, solitum fuisse populum referre ad Senatum de legibus, de comitiis, de bello, de pace, de provinciis, de ærario, de vestigalibus, deq; aliis ad reipublicæ statum pertinentibus? Quis denique nescit, decrevisse Senatum in prædictis omnibus, Populumq; id quod à Senatu erat decretum, iussisse, & iussisse quidem si veller, non iussisse, si nollet? *Bodin. 1. de republ. 10. pag. 198. Dn. Vult. 1. IR. 13. n. 18.* Quæ omnia manifestè contra summam & absolutam Senatus Romani potestatem, tum etiam contra Aristocraticum Romani imperii statum, qui nullus unquam fuit, militans, solideq; eundem refutant.

De Germaniæ Ducibus & Principibus quid dicam? summāne illis potestatem tribuam? Tribuerem lubens, si per veritatem liceret. An enim summa potestate præditi viderentur, qui Vassallos & fiduciarios alterius sese profitentur? qui investituram accipiunt? qui fidelitatem promittunt? Minimè. Cujus ergo inquit Vassalli sunt? Inviçissimi Imperatoris Germanici: qui tanquam verus Imperator, in verè monarchico Germaniæ Imperio, summam potestatem solus verè & propriè obtinet: utcumque Bodinus, cui de vero Germaniæ nostræ statu parum constitit, id ipsum *lib. 1. de republ. c. 9.* neget. Quem & ex Germanis nostris aliqui sequuntur: quod miror. Refutabitur verò ipsorum sententia abundè, ex iis quæ præstantissimus IC. Dn. Hieronymus Treutlerus, *libro 1. exercitationum suarum brevi publicandarum c. 4. & 5.* scribit, ubi plurima ad Germaniæ statum pertinentia, paucisque nota, benevolus lector inveniet. Ac erigite quæso paulisper animos vestros, Auditores, cogitate, quis de regalibus imperii nostri feudis cognoscat? an Camera? an Imperator? cogitate, quis Electores confirmet, & mutet? An-

madver-

advertite, quis Principes, quis Comites, quis Nobiles quotidie
 creet? Perpendite, quis Academias constituat? cuius nomine pas-
 sim in omnibus Germaniæ Academiis Doctores pronuntiætur?
 Ponite vobis ob oculos omnium Principum Germanicorum originem.
 Adspicite Illustrissimum Principem Ernestum Electorem Coloni-
 ensem, quem Rudolphus II. hoc tempore Imperator Augustus in-
 vestivit. Suspiciate magnanimum illum, bellicosissimum, & fortunatis-
 simum heroem, felicissimumque; hactenus Turcici imperii hostem,
 Transylvaniæ Wayvodam, cui propter heroicam virtutem,
 qua multoties recentioribus hæc annis admirabili & penè inau-
 dito cum successu contra Turcicum exercitum pugnavit, eundemque à
 cervicibus nostris depulit, idem Imperator clementissimus supe-
 riori anno Principum Romani imperii dignitatem & fastigium
 attribuit. Oculos denique convertite in Carolum, Comitem
 Mansfeldicum, laudatissimæ memoriæ bellatorem, quem simi-
 liter propter eximia virtutis & experientiæ bellicæ studia ac spe-
 cimina idem Cæsar, non ex speciali Electorum Imperialium aut al-
 terius concessione, sed ex proprio maiestatis jure, sibi tanquam vero
 Imperatori competente, Imperii Principem nuper renunciavit.
 Totā denique Germaniæ nostræ faciem probe considerate: atten-
 dite, ubi per totum Romanogermanicum hoc imperium **MAJES-
 TATIS** vox audiat: an in aula Austriacæ? Saxonica? Brädebur-
 gicæ? Hassiacæ? Bavaricæ? Ipsique dicetis, ibi summā potestatem &
 maiestatem suā fixisse sedem, ubi nomen eius auditur. Dicetis à
 maiestatis appellatione omnes omnino Germanicæ Duces & Prin-
 cipes merito sibi temperare, & pro ea Serenitatis aut Celsitudinis
 titulo contentos esse. Dicetis in sola Imperatoris aula *Majestatis*
 vocē jure audiri. Consideratis denique & probe perpensis rebus omni-
 bus, fatebimini ultrò, Germaniæ nostræ Imperium verè monar-
 chicum esse: omniaque maiestatis jura per se Invidiosissimo Imperatori
 nostro **RUDOLPHO II.** competere: omnes omnino Germanicæ Prin-
 cipes eiusdem vasallos esse: nec minique illorum summam potestatem verè

& propriè tribui posse. Ut ergo, præteritis aliorum Principum nominibus, qui vel in Italia, vel in Gallia, vel alibi eodem jure utuntur, uno dicam verbo, quod res est, dico generaliter: nulli fiduciario principi quatenus fiduciario, summam potestatem & majestatem competere. Suntq; omnimodo contraria, fiduciarium esse, & summam potestatem ac majestatem habere, neq; in eundem Principem, eodem tempore, eodemq; respectu cadere ulla ratione possunt. Quòd si in Germaniæ Principibus id jus est; quantò minus Imperiales *VRBES*, quæ *LIBERÆ* vulgo dicuntur, summam potestatem jusq; majestatis vindicare suo sibi jure poterunt? Neque ergo Argentina, neque Nurenberga, neque Vlma, neque Lubeca, neque aliæ Urbes prædictis similes, summam potestatem & majestatem habent. Quæque libertas ab illis appellatur, vera libertas non est, obsequio scilicet opposita: est à muneribus quibusdam vacatio: est item vestigalium & tributorum quorundam immunitas, vel, ad summum, est reipublicæ, per magistratus ex placito & usu temporis constituendæ potestas, à Romanis Imperatoribus ante hæc tempora, sine ulla majestatis diminutione, ipsis concessa. Quò etiam fit, ut illæ ipsæ urbes adhuc hodie decus Germanici Imperii venerentur, comitorum decreta probent, provocationes sive appellationes ad Cameræ judicium factas recipiant. Minimè vero reciperent, minimè Comitorum decreta probarent, si summam potestatem & majestatem veramq; libertatē haberent. De Helvetiorum libertate idem judiciū esto. Eam enim, teste Stumpfio, sub Friderico II. Imperatore, acquisitam, & postea armis contra Austriacos confirmatam, neque iam olim aliter Helvetii tenuerunt, neq; nūc aliter, quàm salva Romanigermanici Imperii majestate, tenent. Unde est, ut & olim immunitatis concessæ diploma aureis literis scriptum ab eodem Friderico II. Imperatore impetrarint, & verò nunc etiam, quoties Imperator novus eligitur, privilegiorum suorum confirmationem impetrent. Quod.

Quod ipsum satis profectò arguit, etià Helvetios Germanici Imperii majestatem comiter observare, eidemque suam illam libertatem submittere. Sed ad rem. De Advocatis sive patronis imperiorum & regnorum ultimo loco quid statuendum? Tantum verò abest summam in his potestatem in clientestribuere, ut omnem potius ipsis potestatem adimere ausim. Aliud enim advocatia est, aliud potestas: alteraq; cum altera confundi nec potest, nec debet. Quique in clientelam suam imperium vel rempublicam accipit, nihil præter dignitatis ac veræ laudis jucundissimos fructus sperare, suosque clientes opibus & auxiliis adversus hostium copias sine ulla mercede tueri, debet. Quod si quid amplius quis paciscatur, patroni nomen is amittit, perinde, ut, si ex commodato lucri quid fiat, commodati nomen perit. Quid ergo? an non Principes, qui in clientela potentioris sunt, majestatem eius in foederibus comiter observare tenentur? Ita est: sed quid inde? nihil omnino: Cliens enim patronum in foedere eatenus superiorem agnoscit, quatenus personæ ac loci dignitas postulat; non quatenus potestas requirit, quæ nulla omnino est. Distinguendi sunt igitur honores: distinguenda honorum causæ. Honorat patronum cliens: honorant Principem subditi: an eodem modo? Minimè gentium. Subditorum honor ex obsequio est: Clientum honor ex obsequio non est: Unde ergo? ex defensione tantum: cui cum imperio & obsequio nihil penitus esse commune quilibet intelligit. Constat ergo ex prædictis omnibus, summam potestatem esse, quæ maiori potestate definita non sit: constat, solum populum in democratia, solos Optimates in aristocratia, solos denique Imperatores in monarchia summa potestate, & per eam majestate præditos esse. Videamus porro de potestate perpetua.

PERPETUA POTESTAS est, quæ per se nullo tempore definitur: quæque tam diu durat, quamdiu imperans & imperium vivit. Vivit imperium, quousque anima corpori inhæret. Vi-

vit imperium, quousq; imperādi modus non mutatur. Vivit im-
 perium monarchicum, quousq; imperat unus: vivit imperium
 aristocraticum, quousq; imperāt optimates: vivit imperium de-
 mocraticū, quousq; imperant omnes. Dico perpetuam potesta-
 tem esse, quæ per se nullo tempore definitur. Quid illud, *P a r t*?
 Hoc addo, Auditores spectatissimi, ut in memoriā vobis revocē,
 quòd supra dicebam, perpetuam potestatem summæ potestatis
 effectum esse propriū. Cū enim summa potestas sit, quæ ma-
 iori potestate non definitur, quæ nemini paret, quæ à nemine le-
 ges accipit, fieri nequit, quin perpetuā potestatem, de qua jā mihi
 sermo est, tanquam proprium effectum, perpetuò sibi habeat cō-
 junctā. Ut enim tēpore definita dicatur potestas, necesse est, esse
 aliquem, qui definiat: At hīc nemo est: neminem enim audit, ne-
 mini obtemperat, qui summā potestatem habet: temporis itaq;
 definitio nulla hīc est. Tantū ergo illi per se, verē & propriē,
 perpetua potestate præditi sunt, qui summa potestate fruuntur:
 Populus scilicet, in Democratia: Optimates in Aristocratia: Im-
 perator in Monarchia: nemo præterea. Quibus verò ad tempus
 summa in cives potestas tribuitur, cum pacto, ut ejusdē temporis
 decursu potestatem illam deponant, rerumq; à se gestarum ratio-
 nem populo vel Principi reddant, illis nec summā nec perpetuā
 potestatem competere certum est: certum & hoc, summæ & per-
 petuæ potestatis & majestatis, ac totius adeò imperii apud ipsos
 quasi depositi, custodes eos esse tādū, donec summus Princeps
 vel Populus id reposcat, cuius ipsi verē domini, possessores & arbi-
 tri sunt, etiam tum, quando eo non utuntur. Idq; est quod vul-
 gò dicunt Interpretes, cumulativè non privativè absolutam po-
 testatem, omnemq; jurisdictionem ab eo qui statui præest, id est,
 à Populo in democratia, à Principe in monarchia, ab optimatib;
 in aristocratia, subditis concedi. Iterum ergo dicendū, neq; Di-
 ctatorem Romanū, neq; ullum ex magistratibus Romanis etiā
 majoribus majestate usum esse, quia perpetua potestate usi non
 sunt: & vel ideo perpetua potestate usi non sunt, quia summa usi
 non

non sunt, summæq; subiecti fuerunt, penes quam & initium & medium & finis omnis omninò magistratus sive ordinariæ jurisdictionis constitit. Ea si vellet, magistratum rogabat, si vellet, prorogabat, si vellet, abrogabat. Nihil ergo in ipso erat magistratu. Utq; magistratus à se, per & propter se non erat, ita quousque vellet, esse non poterat: fuitq; tamdiu, quamdiu vellet is, à quo, per quem, & propter quem institutus erat, ad annum quidē, si voluntas constituentis esset annua, ad biennium, triennium, quinquennium, decennium, vel ultra, si eiusdem superioris voluntari id etiam placeret. Idque in ordinaria magistratus potestate expeditum est. Quid verò si in annos decem summū imperium uni vel pluribus concedatur: quomodo olim apud Athenienses Archon unus summæ in republica potestati præerat, perpetua ne sic potestas & maiestas collata videbitur? Ipsi intelligitis, Auditores spectatissimi & præstantissimi, perpetuū non esse, quod decennio definitur. Ipsi intelligitis, maiestatem ei non cōpetere, qui post decenniū potestatem sibi creditam deponere, rerumq; à se gestarum rationem reddere cōpellitur. Præterea, quid si potestas summa uni pluribŭsve ea lege in annū vel circiter cōferatur, ne rerum à se gestarum rationē reddere cogantur? quomodo Cnidii in singulos annos sexaginta cives Amymonas, id est, omni exceptione & reprehensione maiores creare sunt soliti. Ne sic quidē imperii maiestatem & perpetuam potestatem propriè sic dictam transferri, & in Cnidiorū Amymonas translatam fuisse quisquam dixerit; cū depositum quasi apud se imperiū anno vertente populo restituere sint coacti. Adeoq; de omnibus illis, qui summa potestate, vel ad decenniū cum onere reddendarū rationū, vel ad annum sine reddendarū rationum onere fruuntur, verè quidē dici potest maximā illis potestatem cōpetere, summūq; illos magistratū gerere: summos verò Principes illos esse, dici nequit. Alius enim Princeps est, cuius ipsi sunt subditi: alius imperii dominus & possessor, cuius ipsi custodiā tenent. Idēq; iudicandū de illis,

illis, quos Regni Regētes Franci appellāt, quibus vel ob infantīā, vel ob furorē vel deniq; ob absentiā Regis vel Imperatoris, regni vel imperii cura subicitur: sive eorū nomine, manu ac sigillo leges, edicta, decreta, rescripta, iussū deniq; omnia sanciantur, sive imperatorū vel regum nomen ac sigillū legibus ac mandatis proponatur. Inter utrumq; enim parum aut nihil interest. Quæque à Procuratore vel Curatore domini nomine geruntur, ab ipso domino geri videntur. Procuratores verò & Curatores sunt, qui curam imperiorū & regnorum, Imperatorum & Regum loco sustinent: Imperatores & Reges non sunt: quemadmodum nec dominus est, qui domini negotium procuratorio vel curatorio nomine gerendum suscipit. Porro, quid si aliquam summæ potestatis particulam Populus vel Princeps legato, vel præfidi, vel alii, quousq; vixerit, precario concedat? satis né sic perpetua potestas collata videbitur? Non quidem nego perpetuam potestatem hoc in casu collatam dici posse: sed per accidēs id fit, non per se. Iam dudum verò dictum est, illam tantummodo potestatem verè & propriè perpetuam esse & dici, quæ per se tempore non definitur, quæque summæ potestatis effectum est proprium, non quæ ex summæ potestatis speciali concessione, atq; ita per accidens, existit. Utque aliàs accidentium ea est indoles, ne substantiam sui subiecti tollant & evertant, ita eandem hoc etiam accidens retinet: neque facit, ut qui verè summam & perpetuam potestatem non habet, habere porro incipiat. Videri ergo potestas eiusmodi perpetua potest, verè tamen perpetua non est. Quid denique si Populus alicui summam ac perpetuam potestatem, quoad vixerit, sine ulla conditione & modo dederit? Subsisto. Si enim potestas illa summa & perpetua, sine magistratus aut legati, aut rectoris, aut curatoris appellatione, nec precario alicui data sit, profectò, omnia omnino magistratus jura omnemq; potestatem non cumulativè sed privativè eidem fuisse concessam fatendum erit, dicendumque, Populum
sua

sua sponte, suo se imperio spoliasse, idque alteri sine conditione donasse, haud aliter, ac privatus aliquis pura donatione rei suæ dominium ac possessionem sine cōditione & modo in alterum transferre solet. Exemplo est Julius Cæsar, in quem Populus Romanus majestatem imperii, sine magistratus, sine legati, sine Rectoris, sine Curatoris denique appellatione transtulit, per eamque translationem imperii formam mutavit, quodque imperium democraticum prius erat, monarchicum porro ut esset, fecit. De qua translatione ita scribit Justinianus *in §. sed & quod principi. Inst. de I. N. G. C. sed & quod principi placuit, legis habet vigorem, cum leger hegia, qua de ejus imperio lata est populus ei & in eum omne imperium & potestatem suam concedat.* Dicit Justinianus: **ET IN EUM;** ad modum eleganter, nervosè & concisè. Satis enim non erat, dicere, Ei, id est, Principi omnem potestatem populū concessisse: id namq; cumularivè & communicativè poterat intelligi, & ad eum sensum trahi: Populum potestatem summam & imperii majestatem non à se abdicasse, sed eandem cum principe, tanquam cum imperii socio communicasse: quomodo sol lunæ splendorem suum communicat. Addendum verò fuit: **ET IN EUM:** scilicet populum: ut intelligeretur, etiam privativè prædictam summæ potestatis collationem à Populo in Principē factam esse, huncque sensum esse: Populum ita in Principem omnem potestatem cōtulisse, ut ipse solus imposterum ipsi etiam populo imperaret, utque omne imperium penes unum esset deinceps, non ut antea, penes omnes: essetque posthac monarchia, democratico imperii statu, exacta fatali eius periodo, in monarchicum transuso. Venio ad potestatem legibus solutam.

LEGIBUS SOLUTA POTESTAS nihil aliud est, quàm potestas à nullo homine leges accipiens. Demonstratio eius similiter ex summa potestate dependet. Cum enim summa potestas sit, quæ majori potestate, majoriq; imperio non definitur, quæque nemini præterquam immortali Deo obtemperat, ipsa ratio

unicuique dicitur, esse aliquam potestatem legibus solutam, quæ summæ potestatis effectum dicatur proprium, quæq; illi ut formæ formatum cohæreat. Ratio quæ hoc dicitur eiusmodi est. Imperare, & leges condere, ut causa & effectum, ut forma & formatum sibi invicem respondent. Utque forma sine formato, & contra formatum sine forma non est, ita etiam imperium sine legibus latis, latæ leges sine imperio non sunt. Deficiente itaq; causa, deficit effectum: deficiente forma, deficit formatum: deficiente imperio, deficient leges: deficientibus legibus, deficit obligatio ex legibus existens: deficiente obligatione, deficit persona obligata. Transferamus thesin ad hypothesein, hoc modo: Deficiente imperio in personam Principis ulli hominum competente deficient leges eundem obligantes: deficientibus legibus Principem obligantibus, deficit obligatio: deficiente obligatione, quid superest? hoc scilicet, quod in quaestione versatur: Principem legibus solutum esse: vel quod idem est, Principem legibus obligatum non esse. Quodq; imperare & leges condere prædicto sibi respondeat modo, nemo ex Interpretibus nostris unquam negavit. Hoc saltem inter partes hæret dissidentes: An leges condere simplicis jurisdictionis, an potius meri imperii effectum sit proprium? quorum hoc Bartolo, illud aliis contra Bartolum & Bartolinos rectissimè placuit. Estque id etiam in ore omnium Interpretum: ei tantum modo potestatem condendi leges competere: cui iurisdictio & imperium competit, & per consequens, neq; Mercatorum, neque Sartorum, neque Sutorum, neque Laniorum, neque Pistorum, neque aliorum mechanicorum collegia, ut nec privatos quoslibet, legum condendarum facultatem habere, cum imperium & jurisdictionem non habeant. Perperam verò dicerentur hæc omnia: perperam à remoto imperio, ad removendam potestatem condendi leges argumentum duceretur, nisi illa ipsa potestas condendi leges impii effectum proprium esset. Quæ pro itaque ex Politicis

& lu-

& Jurecōsultis omnibus, an sit aliqua potestas summa nullo maiori imperio definita? Annuunt omnes. Quæro, an summam potestatem habeāt in Monarchia Imperator, in Democratia Populus, in Aristocratia Optimates? Annuunt hīc etiam omnes. Quæro, an nemo sit qui imperet in monarchia Imperatori, in democratia Populo, in aristocratia Optimatibus? Neminem esse, omnes dicunt. Quæro deniq; an solutus sit legibus Princeps, an solutus sit populus, an soluti sint Optimates? Negant pleriq;. Ridiculum verò est, probare antecedens, & negare consequens. Ridiculum est, affirmare & probare, esse potestatem summam, quæ nemini obtemperet, cui nemo imperet, cui legē nemo proponat, quam ulla lege proposita nemo obliget: & negare, esse aliquam potestatem legibus solutam. Ridiculum denique est, affirmare & probare, Principem summam potestatem habere, nullo maiori imperio definitam: & negare, Principem legibus solutum esse. Indissolubile verò vinculum est, quo summam & legibus solutam potestatem ipsa ratio conjunxit. Indissolubilis consequentia est, quæ à potestate legibus soluta ad Principem legibus solutum procedit. Eritque indissolubilis eò usque, quousque tale formatum erit, qualis forma est. Majestas enim, id est, potestas summa, perpetua, legibusque soluta, Principis forma est, per eamque Princeps est, id quod est. Tolle majestatem, tolle potestatem summam, tolle potestatem perpetuam, tolle potestatem legibus solutam; non erit Princeps; erit Justinianus: erit Carolus: & in summa, erit homo. Quemadmodum, si eruditionem à Paulo tollas, Paulus erit, Paulus eruditus non erit. Verumenimvero, ut concedant adversarii, legibus ab aliolatis Principem solutum esse: suis tamen legibus eundem solutum esse negant. Ostendant verò mihi, quomodo suis se legibus obliget Princeps? quomodo sibi imperet? quomodo sibi obtemperet? quomodo seipsum coërceat? Aliud quod respondeant, non habent, quàm ita Principem sibi metipsi imperare,

sare, sibi metipſi obſeperare, ſed; ipſum legibus obligare, ſi velit.
 At, qualis obligatio hæc eſt, quæ in obligari arbitrium conſertur?
 Legibus equidem noſtris obligatio ejusmodi incognita eſt. In
 legibus enim noſtris ita obligatio definitur, quòd ſit juris vin-
 culum, quo NECESSITATE quis adſtringitur ad dandum vel
 faciendum id, quod dari fierivè jus præcipit. Quale item
 imperium, quale obſequium hoc eſt, quod ex obſequentis volū-
 tate dependet? Omnes, opinor, ſubditi, quorum eſt obedire,
 tale imperium optaverint: omnes Imperatorē talem exoptave-
 rint, qui ſcilicet imperet, ſi obedire velint ſubditi, non imperet, ſi
 obedire nolint. Ego verò contra imperii & obſequii naturam
 eſſe dico, ex obſequentis voluntate utrumque vel alterutrum
 definire. Neque meum hoc eſt commentum. Pleni de
 eo ſunt omnes Politicorum libri: plenæ hiſtoricorum omnium
 paginæ: plena oratorum *μυεθίνια*: plenæ Poëtarum. areulz o-
 mnes. Quorum omnium veriffima ſententia eſt; non ideo ob-
 temperare ſubditos, quia volunt, ſed quia obtemperare debent,
 ideo velle eos debere; aut ſi nolint, cogi eos poſſe; ſi q; contra, quā
 oportebat, agant, pœnis locum eſſe. Si ergo Principes ſuis etiam
 ſubditi ſunt legibus, ex neceſſitate ſubditi ſunt. Quod ſi non ex
 neceſſitate, ſed ex voluntate tantummodo ſubditi ſunt, ne dici
 quidem ſubditi ullo modo poſſunt. Quid enim, ſi obedire le-
 gibus nolint? quid ſi legem, quam hodie tulerunt, brevi tem-
 pore elapſo abrogare velint? annē ſic legibus ſoluti dicentur?
 Credo. Idem ergo eſt, ſi obtemperare velint. Nulla quippe
 in voluntate eſt neceſſitas, nulla coactio, nulla denique pœna.
 Cogi quæ voluntatem non poſſe, univerſaliter & ſimpliciter ve-
 rum eſt, quicquid de coacta voluntate à plurimis non intellecta
 multi diſputent: ad quam diſputationem hoc in loco deveni-
 endum mihi non eſt. Id quæ ſatis intellexit Vaſquius, quan-
 do voluntatem ſuam ſervam ſibi ipſi neminem facere poſſe
 quodam in loco ſcribit. Idemq; non obſcurè innuit Hermo-
 genianus

genianus in l. 22. pr. ff. delegat. 3. dum ait: *Neminem sibi legem dicere posse, ut ab ea recedere ei non liceat.* Dux itaque

toto cælo inter se distinctæ sunt quæstiones: de voluntate Principis una, de obligatione altera.

De obligatione si quæ-

ratur? nullam eam esse dico.

De voluntate si quæ-

dico, ad verecundiam, modestiam, & bonitatem Principis

pertinere, ne quod ex imperii lege, sive majestatis jure sibi li-

cet, licere sibi patiatur: dico, eidem verecundiæ, modestiæ, &

bonitati Principis convenire, ut cogitet, non omne, quod li-

cet, honestum esse: cogitet præterea, non satis esse, ad immorta-

lem & laudatam laudati nominis memoriam, quod sit Prin-

ceps, sed opus esse, ut & sit Princeps bonus; cogitet, se Prin-

cipem esse ex lege imperii, bonum Principem ex conscientia

& honestate: cogitet, dignum esse, & laudabile, si eodem ju-

re, quo alios uti velit, ipsemet utatur: cogitet denique, dignam

majestatem regnantis vocem esse, legibus alligatum se profiteri.

Hæcque voluntas in bonis Principibus perpetua semper fuit.

Quorum idcirco laudes ex hoc ipso capite à multis magnope-

re sunt decantatæ: quod scilicet, cum legibus essent solu-

ti, legibus seipsos subjecerint.

Quæ certè laudes nullæ

essent, nisi legibus reverà soluti fuissent.

Laus siquidem

ex eo quod facere teneris, si facias, nulla omnino quærenda

est.

Videant ergò, quomodo summæ potestati satisfac-

fiant, qui contra potestatem legibus solutam disputant.

Videant, ne sub ipsis quasi manibus summam potestatem amit-

tant, dum potestatem legibus solutam è medio tollunt.

Videant, ne eidem summæ potestati tanquam matri, pro filia-

bus legitimis, potestate scilicet perpetua & legibus soluta, adul-

terinum partum supponant.

Videant, ne limpidissimos im-

perii & jurisdictionis fontes opinione sua perturbent.

Videant denique, ne suam defendendo sententiam, Ulpiani & Justinia-

ni authoritatem extenuent, ac pedibus quasi conculcent. Equi-

dem

dēū si falsum est, Principem legibus solutum esse: erravit Ulpianus *lib. 13. ad l. 1. ul. Pap.* id affirmans: erravit Justinianus Ulpianum in *l. Princeps 32. ff. de ll.* secutus: falsa deniq; & erronea est *d. l. 32. ff. de ll.* sententia: Principem legibus solutum esse. Hac enim legis illius verba sunt: *Princeps legibus est solutus: Augusta autem licet legibus soluta non est: Princeps tamen eadem illi privilegia tribuit, quae ipse habet.* Absit verò ab Ulpiano, absit à Justiniano error: absit à *d. l. princeps. 32. ff. de ll.* falsi ulla suspicio. Cumque non distinguat Ulpianus & post eū Justinianus, sed indistinctè, Principem legibus solutum esse, dicat, cū etiam res ipsa distinctionem nullam recipiat: quid distinctionibus opus est? quid opus est, dicere, ex sententia Græcorum interpretum, poenariis legibus Principem solutum esse? quid opus est, dicere ex sententia Cujacii, *15. obs. 36.* caducariis legibus Principem non obligari? quid opus est, ad solennia juris solutam Principis potestatem cū Donello *1. com. 17.* Corasio *2. misc. 25.* Friderico Bruckmanno, *tr. de regalib. p. 1. §. soluta potestas, c. 3. n. 81.* & aliis restringere? Quid denique opus est, ad distinctionem inter vim legis directivam & coercivam cum Dominico Soto *li. 1. de l. & l. q. 6. art. 7.* Covarruvia, *ad c. alma. p. 1. §. 1. n. 4.* Gregorio de Valentia, *tom. 2. com. theol. disp. 7. q. 5. punct. 4.* Fachinæo, *lib. 1. controversiarum cap. 2.* aliisque confugere? Idem profecto error est, dicere ex sententia Gothofredi in *d. l. princeps: 32. ff. de ll. & in Nov. 105. inf.* Danxi; in *Politica Christiana*; & aliorum: Nullis legibus Principem solutum esse: & dicere, ex sententia Donelli, Cujacii, Corasii & aliorum: quibusdā legibus Principem solutum esse, quibusdā solutum non esse. Erroris utriusque mater eadem est, obscuritas nimirum, cui majestatis jura ab omnibus politicis scriptoribus involuta sunt: ut in exordio supra monui. Dubiumque mihi nullum est, neque Cujacium; neque Donellum, neque alios de majestatis jure, deque natura summi imperii, quicquam cogitasse, quando stripserunt; aliquibus saltem legibus, non etiam omnibus, Principem

cipem solutum esse. Ac quid quæso responsuri sunt Donellus;
 Cujacius, Corasius, & alii, si quæretur ex ipsis, quare poenariis,
 quare caducariis, quare solennium legibus potius, quàm legibus
 aliis solutus sit Princeps? Quid item responsuri sunt, Dominicus
 Soto, Covarruvias, Fachinæus, & alii, si quæretur, quare ad vim
 legis coërcivam potius, atque ita? d' particularem legis effectum,
 quàm ad legem in universum soluta Principis potestas restrin-
 genda sit? Imò quid responsuri sunt, si generaliter ex ipsis quæ-
 ratur, quare ulla lege Princeps solutus sit? Nescio equidem,
 quid respòdere voluerint aut potuerint, cùm in ipsorum scriptis
 nihil hac de re invenerim. Quicquid verò sit, aliud profectò
 respondere non potuerunt, quàm, idèò Principem legibus solu-
 tum esse, quia summa sit præditus potestate, quia nemo illi im-
 peret, quia nemo leges illi proponat, & denique, quia sibi ipsi im-
 perare, sibi obedire, sibi que manus ligare nulla ratione possit.
 Idèque Vipianus etiam & Justinianus procul dubio respòdissent;
 si de ratione *l. 32. ff. de ll.* ex ipsis fuisset quæsitum. Interrogati
 inquam, quare Princeps legibus sit solutus? respòdissent, quia
 summa sit præditus potestate, ac ob id nemini obsequatur. Inter-
 rogati iterum, quare Augusta legibus soluta non sit? respòdissent
 idèò id fieri, quia summa potestate prædita non sit, & omnino
 quia Imperatori subsit. Quæ responsio similiter danda erit in-
 terroganti, quare magistratus legibus solutus non sit? Idèò enim
 magistratus legibus solutus non est, quia maiori potestati subest,
 quæ ipsi imperat, quæ leges ei præscribit, quæ denique eundem
 coërcet. Quod si maior potestati non subesset, legibus solutus
 æquè ac Princeps dici posset. Quodque subsit maiori potestati
 magistratus, jamdudum probavi, quando summam potestatem
 ei non competere ostendi. De Romanorum Dictatore, de
 Principibus Germaniæ, deq; aliis, quibus summam potestatem
 non competere, jamdudum demonstravi, idem per omnia ju-
 dioium esto; legibusque solutam potestatem nemini illorum

competere, verissima sententia esto. Planè per se legibus soluta non est Augusta: per se legibus solutus non est magistratus: per se legibus solutus non est Dictator: per se deniq; legibus soluti non sunt alii jam enumerati: per accidens tamen, ut soluta sit legibus Augusta, ut solutus sit legibus Dictator, ut soluti sint alii, fieri potest. Verùm accidens hoc subiecti naturam non mutat.

Semper enim verum est, neque Augustam, neque Dictatorem, neque magistratum, neque alios legibus solutos esse, cum nec summa potestate prædita sit Augusta, præditus sit Dictator, præditus sit magistratus, præditi sint alii.

Idque vult Ulpianus, quando in *d. l. 32. ff. de fl. dicit: Augustam legibus quidem solutam non esse: Principem tamen eadem illi privilegia tribuere, quæ ipse habet.* Quasi dicat Ulpianus: per se quidem legibus solutam non esse Augustam, per accidens tamen solvi eandem iisdem posse: accidens autem illud esse specialem Principis concessionem.

Verè enim specialis eiusmodi concessio, tribuens Augustæ summam & legibus solutam potestatem, quam sine speciali concessione non habet, accidens est, efficitque, ut de Augusta prædicetur, quod per se prædicari nulla ratione poterat.

Quomodo & Cn. Pompeium olim lege Gabinia legibus solutum fuisse, posteaquam extra ordinem datum ei esset imperium in annos quinque; ut adversus Piratas bellum gereret ex Plutarcho didicimus. Verè enim potestas illa Pompeij per se legibus soluta non erat, quia summæ potestatis effectum proprium non erat: erat ex accidenti tantum: accidens autem illud erat specialis concessio sive privilegium lege Gabinia comprehensum, & à Populo specialiter Pompeio tributum.

Audistis, Auditores spectatissimi & præstantissimi, quæ mea cum Bodino de soluta legibus potestate, deque proposita quaestione, sit sententia: audistis, quibus ego legibus Principem solutum esse credam: cognovistis denique iisdem me limit-

limitibus definire, potestatem summam, & potestatem legibus
 solutam. Limites summæ potestatis sunt tota hæc rerum na-
 tura: In ea enim nemo est, qui summo Principi, summam
 potestatem habenti imperet. Iidem legibus solutæ potesta-
 tis limites sunt. In tota enim rerum natura similiter nemo
 est, qui leges Principi præscribat, quibus obtemperet, ad quas
 imperium & actiones suas omnes conformet. Tantum ergo
 civilibus legibus ab homine sancitis solutus est Princeps, solu-
 tus est Populus, soluti sunt optimates. De naturalibus &
 gentium legibus si quærat? dico constanter, Principem iis so-
 lutum non esse: dico, naturales leges Principem abrogare & vio-
 lare non posse: dico, non licere Principi movere terminos, quos
 Deus optimus maximus sempiternis naturæ legibus regit: dico,
 fas Principi non esse, Idololatricis cultibus indulgere, peierare,
 homicidia perpetrare, adulteria committere, bona subditis eri-
 pere, rem publicam deformare, statum œconomicum, ecclesia-
 sticum, politicum, subvertere, dominiorum distinctionem tollere:
 aliâq; divinis naturæ & gentium legibus cõtraria facere: dico de-
 niq; pactis conventis Principem æquè ac subditos obligari. Estq;
 vox illa horrenda, monstrosa, diabolica, omnium homicidiorum,
 parricidiorum, incestuum, adulteriorum, aliorumq; scelerum à scele-
 ratis Imperatoribus perpetratorum nutritrix & patrona, furiarum fa-
 cibz digna, & ad infernales furias ableganda, quæ naturæ & gen-
 tiû legibus Principem solvit, quæ turpissima Imperatorum scele-
 ra peccatum esse negat. Scelerati sunt Imperatores, Imperatõ-
 ris & Principis nomine indigni, vereq; tyranni, qui in naturæ &
 gentium leges imperium sibi sumunt, qui, quod liber, licere
 sibi putant, qui, dum bona, sine iusta ratione, sine emptione,
 sine permutatione, sine præscriptione, sine successione, subditis
 eripiunt, dum adulteriis, parricidiis, homicidiis, incestibus, a-
 liisq; nefandis sceleribus sese polluunt, satis suam maiestatem defun-
 gi putant. O diabolicam verò maiestatem: ô scelus: ô inju-

riam: ô miseram rempublicam, tyrannis eiusmodi subiectam: ô accusationem æquissimam, contra tyrannos, eiusmodi propositam: ô iudicium iustissimum, ad dijudicanda eorundem scelera institutum: ô testimonium verissimum, quo vincuntur: ô condemnationem æquissimam: ô supplicia, denique, dignissima, quibus scelerala illa Sathanæ catarmata plestuntur. Ubi verò accusantur Imperatores scelerati? In foro conscientia, adeoque in conscientia ipsa: à quo accusantur? à conscientia: cuius testimonio convincuntur? cōscientia, quæ mille testium loco est: à quo condemnantur? à cōscientia: à quo supplicium patiuntur? à conscientia. Conscientia ergo mala forum est: est actor: est testis: est iudex: est deniq; carnifex, facibus, fune, rota, gladio, igni, sceleratas sceleratorum Imperatorum animas angens, crucians, torquens, & ad quoslibet desperationum angulos impellens. Hec est, hæc inquam est, quæ Caligulam, quæ Neronem, quæ Vitellium, quæ Domitianum, quæ Caracallam, quæ Heliogabalum, quæ Julianum Apostatam, quæ denique alios Imperatores sceleratos, variorum scelerum reos postulavit, accusavit, proprio testimonio convicit, damnavit, supplicio affecit, & per tragicum vitæ exitum, perque fremitus horribiles ex Dei subscellio, id est, ex regis maiestatis solio in diabolorum subscellia, inque gehennam ignis præcipientes egit. O digna tyrannis eiusmodi subscellia: ô dignam ipsis aulam, quam non regia voce, sed gemitu & fremitu complectat: ô verissimam funebrem illam, à Juvenali jam olim decantatam, & in tyrannorum omnium exequiis decantandam cantilenam:

*Ad generum Cereris sine cade & sanguine paucos
Descendisse Duces, & sicca morte Tyrannos.*

Cæterum, an non contraria sunt, civilibus legibus Principem solum affirmare, & naturalibus ac gentium legibus eundem solum negare? Minimè verò contraria sunt: sunt diversa tatum, & ob id ex diversorum natura in eodem esse subiecto nulla

ratione

ratione impediuntur. Civilibus legibus solutus est Princeps, quia nemo est, qui civiliter Principi imperet, & imperando civiles illi leges præscribat. Naturalibus & gentium legibus solutus Princeps non est, quia Deus illi imperat. Vbi ergo imperium, ibi lex, ibi obligatio ex lege, ibi obedientia, ibi poena inobedientiæ proposita. Est verò lex naturæ lex Dei, à Deo ipso immediatè lata & hominum animis Inscripta: quam non didicimus, accepimus, legimus, sed cum natura ipsa arripimus, hausimus, expressimus: ad quam non docti, sed facti, non instituti, sed imbuti sumus. Est item gentium lex à Deo naturali rationi & naturæ impressa. Recteq; id definit Justinianus in §. 1. *Inst. de j. n. g. c.* quando jus gentium esse dicit, *quod naturalis ratio inter omnes homines constituit*: intelligens per naturalem rationem ipsam rationem humanam, quæ Principi non ut principi, sed ut homini inest, eundemque ab aliis non ut Principem à principe, à magistratu, à iudice, à subdito, sed ut hominem ab homine, ut Petrum à Paulo distinguit. Quomodo verò, inquiet aliquis, naturalis ratio, ex sententiâ Justiniani gentium jus constituit? Dicam breviter. Humanæ rationis, sive animæ rationalis duæ sunt facultates: cogitativa & intellectus. Cogitativa est prior vis animæ rationalis organica, qua homo ad suas ipsius vires & actiones cogitando se convertere, earumque disquisitione per actum reflexum se & sua ipsius, tum etiam alia extra se constituta cognoscere potest. Utque aliæ facultates animæ suos habent affectus, suas item locomotivas: ita hæc etiam facultas, suum affectum, suamque locomotivam habet. Affectus cogitativæ additus est amor sui & aliorum. In amore aliorum sunt hæc: amor cognoscendi statum aliorum hominum, tam eorum, qui nobiscum vivunt, quam eorum, qui longè à nobis absunt: item amor societatis: fuga solitudinis: & denique cupiditas communicandi cum aliis bona nostra tam scientiæ quàm alia, quæ à Deo nobis sunt data. Locomotiva eidem cogitativæ addita, est vis communicandi cum aliis

E homini-

hominibus ea quæ in animò à nobis sunt concepta: effiq; vel generalis, in genere ad omnia interna tam cognita quàm appetita prodenda pertinens: vel specialis, ad certos tantùm affectus relata: illa est vis loquendi: hæc est vis ridendi & plorandi. Intellectus est altera vis animæ humanæ inorganica, per quam anima, etiam destituta corpore, esse suum exerit, omnia intelligens cognoscens & iudicans: quæque cogitativæ præest, per eamque non aliter ac Rex quidam per Præsides & Præfatos suos vires inferiores, puta vim sentiendi & vegetandi gubernat, & ad agendum impellit. Affectus eidem additus est voluntas intensa, id est, vis eligendi & appetendi ea, quæ intellectui sunt congrua. Locomotiva eiusdem est voluntas extensa, id est, vis agendi, & ad agendum propria vi insurgendi seque extendendi & impellendi vires reliquas, impellendi cerebrum, ut moto & impulso cerebro, impellantur nervi, impulsis nervis, impellantur spiritus, motis spiritibus, moveantur muscoli, musculis deniq; motis, moveatur caro, moveantur manus, si sit apprehendendū, moveantur pedes, si sit eundum, moveatur lingua, si sit loquendum, moveantur oculi, si sit videndum, & sic de cæteris. Ut ergo ex humana ratione est, cognoscere & amare seipsum, & homines alios, communicare animi sui cogitata cum aliis, cōmunicare cum aliis bona sibi data: ita medium etiam per quod commodè alios cognoscere & amare, cū iisq; colloqui queamus, ex eadem esse, eiusdemq; effectum esse, meritò dixeris. Medium verò illud est politica societas: est jus gentium, cui tanquā fulcro immoto omnis politica societas incumbit. Quòd jus, quamq; societatem ad eum finem naturalis ratio constituit, ut exitū haberet amor erga homines alios animæ hominis cujuslibet saltem nō monstrosi insitus: ut exitū haberet vis cōmunicandi cum aliis ea, quæ à Deo singulis sunt data & concessa: ut deniq; exitū haberet cum aliis conversandi cupiditas. Verè ergo naturalis ratio domus, pagos, oppida, civitates & urbes edificavit, respublicas

blicas instituit, regna denique & imperia constituit, & in summa, omnem omnino societatem tam œconomicam quã politicam peperit: legesque invenit, quibus omnia cum œconomicæ tum politicæ societatis membra ligamento quasi arctissimè constringi oportuit.

Stet itaq; sententia: *Naturalibus & gentium legibus nullo modo, civilibus legibus omnimodo Principem solutum esse*: stent eius sententiæ fundamenta: stet immortum Dei in Imperatores imperium: stet immota potestas summa, potestas perpetua, potestas legibus soluta: stet deniq; immota majestas. De qua nihil porro dicam. Satis enim est, membra eius à me hæcenus esse definita: satis est, cognita potestate summa, perpetua, legibusq; soluta, cõstare jam nobis, Civilibus legibus Principem solutum esse. Plura tamen de majestate, deq; majestatis jure, si quis scire desiderat, regalia majora & minora ob oculos sibi ponat: quæq; de iisdem ab Interpretibus nostris scripta sunt, legat: parum hoc: relegat: parum & hoc: in succum & sanguinem convertat: nihilq; erit, quod ad majestatem cognoscendam, ad cognoscenda majestatis jura, desiderare amplius possit. Quæ enim inter regalia vulgò numerantur, ea omnia majestatis effecta sunt propria. Majestatis proprium est, leges condere, interpretari, abrogare; bellum hostibus indicere, & finire: præmia & poenas distribuere: privilegia conferre: nobilitare: legitimare: famæ restituere: academias condere: magistratus, doctores, magistros, licentiatos, poetas, tabelliones creare, de sententiæ viribus cognoscere: extrema provocatione frui: nummis pretium, pondus, nomen & figurã præscribere: de ponderibus statuere: vectigalia ac tributa ex-gere: bona vacatã occupare: nundinas constituere: & si quæ sunt ejusmodi. Læsaq; majestatis crimen committit, qui unam ex prædictis omnibus, absque speciali Imperatoris concessione, propria autoritate sibi sumit: quo crimine nullum in republica est gravius.

Hæc, hæc majestas illa est, ex qua, velut ex lumbis, summo aliquo

fonte, omnes omnino dignitates in subditos benè de literis, benè de armis, benè de republica meritos derivantur. Hæc illa majestas est, quæ omnia Imperia, potestates omnes suo splendore obfuscat. Hæc denique majestas illa est, ob quam Deos sese Reges & Principes nominant. O sacram, ô venerandam majestatem; ô sacros Principes majestate illa præditos; ô sacrum imperium, cui leges, cui corpora, cui bona subditorum omnia altissimus subjecit. ô incogitantiam Innocentii III. Pontificis, qui in c. sollicitæ, ext. de major. & obedient. majestatem Imperatoria majestate maiorem sibi tribuit, dum suæ majestatis decus soli, Imperatoriam verò majestatem lunæ comparat, seque Imperatoribus tantò maiorem esse dicit, quantò Sol Lunam magnitudine sua superat.

Nihil jam restat, Auditores præstantissimi, de quo dicam: causa omnis dicta est. Si quid verò dicendum superest, ad contrariorum argumentorum refutationem id omne pertinet. In qua refutatione essem longior, si in præcedentibus potuissem esse brevior. Et vel ob id longior non ero, ne patientia vestra diutius videar abuti, néve tempus quod solennitatibus hac eadem hora peragendis debetur, dicendo infumam. Utque ad quatuor argumenta priori loco mihi objecta, uno respondeam verbo: ex separatis ea omnia esse, nec ad rem præsentem quicquam facere, dico. Facerent verò omnium maximè, dictamque sententiam impugnarent indissolubiliter, si omnibus etiam naturalibus, etiam gentium legibus Principem solutum esse, dicerem. Sic enim bipatentes portas libidini Imperatorum patefacerem: sic meam de soluta Principis potestate sententiam cum licita tyrannorum interfectione committerem: sic seditionum faces accenderem: sic rapinam, sic alia scelera tyrannorum probarem: sic denique à Deo damnaram, rationi contrariam, politicæ societati inimicam, omnium bonorum Principum auribus indignam, & ad infernales furias ablegandam sententiam defenderem.

derem. Absint verò à me hæc omnia. Absit illa ab animo meo sententia: *Etiã naturalibus & gentium legibus Principem solutum esse.* Quintum argumentum ab Augusta desumptum quod attinet: dico simpliciter: ab Augusta ad Augustum consequentiam nullam esse: nihilq; impedire, quo minus solutus sit legibus Augustus, utcunque Augusta legibus soluta non sit. Alio enim jure Augustus, alio Augusta utitur: quæq; potestas in Augusto est, in Augusta non est. Augustus summa & soluta legibus potestate utitur, quia nemini est subjectus: Augusta non utitur, utpote cum Augusto sit subjecta: jure scilicet familiæ, quatenus uxor eius est, jure item reipublicæ, quatenus in eam non minus ac in subditos alios Imperium suum Augustus exercet. Estque inaudita vox illa, tum etiam politicis omnibus incognita: Majestatem imperii Augusto cum Augusta communem esse. Ac quid privilegio, quid speciali Principis concessione opus erat, si per se suo jure majestas Augustæ competit? Quid opus erat, dicere, per accidens fieri, quod per se fit? quid opus erat, dicere, per accidens, id est, per specialem Principis concessionem legibus solutam esse Augustam, si per se legibus soluta est? Quodque per accidens soluta sit legibus Augusta, abundè *d. l. Princeps. 32. ff. de ll.* probat. Nihil exemplum Theodori Justiniani, Augustæ me moveret. Dem enim, Justinianum aliquoties in consilium eam adhibuisse: concedam, eiusdem instinctu aliquoties leges tulisse: quod *de l. 4. c. de lib. prær.* nescio an audacter magis quam verè affirmat Bodin. *lib. 5. de republ. c. 2.* ubi d. l. 4. non tam à Justiniano, quam à Theodora latam esse dicit: concedam & alia prædictis similia. Quid sequetur? Hoc forsitan, peccasse Justinianum, quod nimio plus Theodoram suam amaverit, quodque præ nimio amore in rebus & negociis, ubi non decebat, nimium ei tribuerit. Quemadmodum ob id Justinianum effeminatum & plus æquo uxorium nominant, Petrus Gregorius 47. *Synagm. 11. n. 2.* Stephanus Forcatulus *de ocul. Jurispr. dial. 2. n. 5.* Ant. Faber,

3. *conject.* er: qui & hoc in eadem vituperat, quod fœmineo sexui plus æquo faverit, cui nunquam satis consultum esse, bonus Imperator semper credidit. Sed odio mulierum forte Fabro, Gregorio, Forcatulo, aliisq; excidit, quod excidisse audi vists. *Scriptum* argumētum à naturalibus legibus desumptum sequitur. An verò quisquam est, qui nullis omnino legibus Principem solutū esse credat, quia naturalibus & gentium legibus solutus non sit? an quisquam est, qui existimet, leges omnes civiles ex naturalibus desumptas, & naturales esse? Sunt equidem in omni jure civili præcepta juris naturalis, sunt præcepta juris gentium: sed sunt in eodem etiam civilia plurima: siquæ civilia nulla essent, siquæ naturalia in eo essent omnia, quomodo civile jus civitatis unius proprium dici ulla ratione posset? *Veræ ergo erit collectio:* Quædam leges civiles sunt naturales, ex naturalibus desumptæ: Ergo quibusdam legibus civilibus Princeps non est solutus: non quod civilibus solutus non sit, sed quod naturalibus & gētium legibus solutus dici neutiquam possit. Quod si argumentum quis invertat, & vel ita concludat: Nullæ leges civiles sunt naturales: Ergo nullis legibus civilibus Princeps obligatur: vel ita: omnes leges civiles sunt naturales: Ergo omnibus legibus civilibus Princeps obligatur: totū nego. Falsum enim est, nullas leges civiles naturales esse: falsum item: omnes leges civiles naturales esse, ut paulò antè ostendi. Sequitur argumentum septimum ex inscriptione l. 32. ff. de l. petitum. Descripta est lex illa ex libro 13. Ulpiani ad l. Juliam Papiam, quæ de Caducis erat lata. Inde ergo Cujacius acutissimi ingenii vir, cōferens nigrū cum rubro, legemq; ex inscriptione explicās, quod in eadem dicitur, Principem legibus esse solutum, ad caducarias leges restringit, hisq; itummodò Principem solutum esse dicit: ingeniosè quidem, sed nimis profecto divinatoriè. Quis enim credat, hanc Ulpiani mentem fuisse. Planè, si de caducariis saltē legibus cogitasset Ulpianus, nullo negotio caducaril

voca-

vocabulum addere, atq; ita particulariter loqui potuisset. Tantum verò abest, id Ulpianum cogitasse, ut potius particularem propositionem, quæ est, caducariis legibus Principem non obligari, ex universali, quæ est, civilibus legibus Principem non obligari, confirmare eundem voluisse, certò constet, saltem ex bona consequentia, quàm institutum Ulpiani *dicto libr. 13. ad l. Jul. Pap.* nobis suppeditat.

Egit enim Ulpianus eo in loco de legibus caducariis, iisq; Principem solutum esse, probare voluit. Utq; probaret, tertio illi argumento probante erat opus. De quo sollicitè Ulpianum cogitasse nullum est dubium. Commodius verò invenire non potuit hoc ipso, quod genus ei suppeditavit.

Genus est: Principem legibus esse solutum. Quod si verum est, facilè obtinuit Ulpianus: Etiam caducariis legibus Principem solutum esse. Quicquid enim affirmatur de genere universaliter, id de qualibet specie generi inclusa affirmari necesse est. Neq; alia ipsi probatione opus fuit. Dubiumq; non est, tertium illud argumentum, utpote *xpi bueavor*, multis dicto loco Ulpianum probasse.

De quo constaret nobis plenius & rectius, si Ulpiani ad leges caducarias cōmentarii superessent integri. Ac ne ullo utar circuitu, illud mihi expediat Cujacius, aut quilibet alius Cujacii partes in se recipiens, quare caducariis potius, quàm aliis legibus solutus sit Princeps? expediat & hoc, an summā, an legibus solutam potestatem, & omnino an majestatem recipiat & probet? si probat, sibi ipsi contrarius est: si improbat, refutet: eritq; refutatio eius prima.

A nemine enim verissima Bodini, de summa, de perpetua, de legibus soluta potestate & majestate, sententia, hucusque est refutata.

Ac quis non animadvertit, flagellari tacitè Justinianum à Cujacio, quod legem illam 32. particulariter ab Ulpiano intellectam, ut ipsi videretur, universaliter conceperit, & sub titulum de legibus similiter generalem posuerit? Quis item non videt, omnem de soluta Principis potestate quæstio-

nem ex Cujacii sententia hodie sublatam esse? Si enim cadu-
cariis tantummodò legibus solutus fuit Princeps, frustra de iis,
utpotè à Justiniano per *l. un. C. de cad. toll.* jamdudum sublatis am-
plius hodie quæritur.

Pergo ad *l. 3. C. de testam.* cuius verba
hæc sunt. *Ex imperfecto testamento nec Imperatorem vindicare he-
reditatem posse, sæpe constitutum est.* Licet enim lex Imperij
solennibus juris Imperatorem soluerit, nihil tamen tam proprium

imperij est, quàm legibus vivere. Inde ergo Donellus,

Corasius, Zasius, Pruckmannus & alii eam consecrerunt senten-
tiam: Juris quidem solennibus solum esse Principem: legi-
bus aliis solum non esse: nimis item angustè & divinatoriè.
Solennium enim in *d. l. 3.* mentionem facit Alexander, eò quòd
de solennibus in testamento requisitis, inque proposito testa-
mento omissis, esset quæstio. Neque id infrequens fuit Impe-
ratoribus, ut ad hypothesin, factique speciem propositam verbis
itidem specialibus, & ut ita dicam, hypotheticis, responderent,
responsuri per thesin, si in thesi ex ipsis fuisset quæsitum. Quo-
modo plurimæ Codicis leges decreta potius sunt, quàm edicta,
hypothesis, inquam, potius quàm thesis, uni potius personæ ac-
commodata, quàm sine personarum determinatione generali-
bus verbis concepta. Ex quibus si quis inferat, in aliis idem non
esse, argumento à contrario sensu deducto, cum in jure multo-
ties impingere necesse est.

Ut enim argumentum illud à con-
trario sensu aliàs momenti sit maximi, ex Codicis tamen legibus
petitum momenti est minimi. Idemque de præsentī argu-
mento Donelli, Corasii, Pruckmanni & aliorum est dicendum.

A contrario enim procedit argumentum, si dicas: Juris solenni-
bus solutus est Princeps: Ergo alijs legibus solutus non est. Malè:
cum contrarium in jure & ratione sit fundatum; contrarium in-
quam quòd est: Etiam alijs legibus ad alia quàm solennia per-
tinentibus Principem imperij lege solum esse. Probat id *d. l.*
Princeps 32. ff. de ll. quæ simpliciter & indistinctè Principem le-
gibus

gibus solutum esse dicit. Probat idem *L. 14. de manumiss.* Pro-
 bat denique id majestatis jus, quod imperii lex ab Alexandro in
d. l. 3. C. de testam. item lex Augusti, à Paulo, in *d. l. 14 ff. de manumiss.*
 eodem sensu dicitur. Quin etiam illa ipsa *lex 3. C. de testament.*
 hanc sententiam expressè refutat. *Dum enim Alexander* ad hy-
 pothesin propositam respondens solennium meminit, mox e-
 guum etiam in genere mentionem facit, siquidem speciem ex genere
 confirmat: ut, cum nihil tam proprium sit imperii, quàm legibus
 vivere Imperatorem utrumque idem solutus sit, inde intelligatur,
 idem de solennibus dicendum esse. Ac dicat, quæso, mihi Donellus,
 quare solennibus juris potius, quàm legibus aliis solutus sit Prin-
 ceptum? tum etiam imperii legem, id est, majestatis jus ipsamque ma-
 jestatem & potestatem legibus solutam, utpote bonam & præci-
 puam eius partem, unà cum potestate summa, refutet. Si refutave-
 rit, seipsum refutabit. Remota enim majestate nullis omnino le-
 gibus solutus erit Princeps, ne illis quidem, quibus Donellus eum
 solvit. Si refutare non poterit, stabit mea cum majestate sententia.
 Venio ad *lex imperfecto 23 ff. de legat. 3.* ex qua præstantissimus Ju-
 reconsultus Dionysius Gothofredus *l. 32 ff. de ll.* hoc modo in-
 terpretatur: quasi ea Ulpiani mens sit. Videri quidem Principem
 legibus esse solutum, verè autem solutum non esse: Sed præ-
 ter Ulpiani, præter Pauli mentem, profectò. Et si enim Pau-
 lus in allegata *l. 23. de leg. 3. Principem legibus solutum videri,* di-
 cat, minimè tam en hoc vult, verè & propriè Principem legibus
 solutum non esse. Quid enim illa sibi volunt verba: *In verecun-*
dum esse, si Imperator non servet ea que legibus præscripta sunt?
 Quid item illa præ se ferunt verba: *decere tantæ majestati eas*
servare leges, quibus ipse solutus esse videtur? Equidem,
 quod verecundum, quodque decere alicuius permittitur, juris
 necessitati subiectum non est. Cur ergo non simpliciter dicit Pau-
 lus: *Principem legibus solutum esse?* ut dicat, solutum eum videri?
 Quia nimirum perinde est, & quia sensus idem est siue dicas, solutum

esse, five, solum videri. Qui enim solutus est, videri etiam solutus potest: quod si solutus non esset, ne videretur quidem. Sed vocabulum *Videri* improprietatis notam esse dices? Aliquando id concedo: quando nimirum proprietatis vocabuli subiectæ rei repugnat: quod hic metuendum non est. Responsio ad *L. 4. C. de legib.* superest. Cujus verba sunt: *Digna vox est maiestatem regnantis, legibus alligatum se Principem profiteri: adeo de auctoritate juris nostra pendet auctoritas, & revera maius Imperio est, submittere legibus Principatum: & oraculo presentis edicti, quod nobis licere non patimur, alijs indicamus: Dicunt Imperatores: Juxta leges se vivere.* Sed, an quia secundum leges vivunt, legibus ideo soluti non sunt? Nihil minus. De eo enim ne cogitasse quidem Imperatores satis *d. l. 4. C. de ll. satis d. l. 3. C. de testam. satis deniq; §. fin. Inst. quibus mod. test. in firm.* probat. Dicitur in *d. l. 4. C. de ll.* maius imperio esse, submittere legibus Principatum: dicitur in *d. l. 3. C. de testam.* licet imperii lex, Principem illi tolverit: dicitur deniq; in *d. §. si. licet legibus soluti simus, attamen legibus vivimus.* Quibus bellem admodum convenit, quod in Panegyrico ad Traianum Plinius scribit, ubi, se nunc primum audire, inquit, nunc primum se discere, non esse Principem supra leges, sed leges esse supra Principem. Quid ergo est? quis, inquam, *d. l. 4. C. de ll.* sensus est. Uno dicam verbo: tanquam diversa ponunt Imperatores, Legibus solutum esse, & legibus vivere: At diversè dicta & scripta contrariè intelligenda & explicanda non sunt. Contrariè verò intelliguntur, si uno posito, removeri alterum dicatur.

Ita sanè jam, Auditores spectatissimi, probatis probandis, refutatisq; refutatis omnibus, suffragia vestra conferte: iudices æquos vos præbete: sententiam veram rectâ animi æquabilitate pensitate: suum Principi summo tribuite: legibusq; civilibus eundem esse solum, benevolè unâ mecum statuite.

MISCELLANEA

EX DECRETO ET AUTHORITY
TATE AMPLISSIMI ET CONSULTISSI-

mi Senatus Facultatis Juridicæ, in inelyta Marpurgenſi Aca-
demia, pro Doctoratus gradu in utroq; jure consequen-
do, publicè ad disputandum pro-
posita, ab

ANDREA SCHEPS, BOLES-
lavienſi Sileſio.

ix. Julii, in Auditorio Jureconsultorum, horis consuetis.

THESIS I.

Iustitia, secundum veram Justiniani & Ulpiani defi-
nitionem, pars est virtutis: virtus non est. Idemq; de
prudentia, fortitudine, & mediocritate, judicium
est.

Ius neq; ars est boni & æqui, ut vulgò Interpretes
definiunt: neq; bonum & æquum, ut Conano, Corasio, aliisque
videtur. Quid ergo: Præceptum virtutis.

III.

Ius naturale non est, quod natura omnia animalia docuit. At-
qui Vlp. & Justin. id affirmant? Varii sunt in explicâdo Vlp. & Ju-
stiniano Interpretes. Mihi ex omnibus sola Donelli *diapota* placet.

IV.

Ius gentium cum naturali jure idem esse, Donellus putat. Sed
quomodo idem esse possunt, quæ causa efficiente, quæ forma,
quæ sine, quæ effectu, quæ subiecto, quæ objecto, quæ deniq; ad-
juncto differunt?

V.

Rectissimè sentiunt, qui jus gentium in primarium & secun-
darium

darium distinguunt: pessimè verò labuntur, qui eandem distinctionem naturali juri accommodant.

VI.

Jus scriptum à non scripto sola efficiente causa distinguitur. Frustrà ergò, an scriptura ad formam ejus pertineat, quaritur.

VII.

Legem 2. C. quæ sit longa consuetudo, cum l. 32. ff. de ll. variè conciliant. Omnes principium petunt. Quaritur enim an d. l. 2. de consuetudine loquatur? Quod non admitto.

VIII.

Quomodo & quibus legibus solutus sit Princeps, variè expli- cant, Cujac. Don. Gothof. Danaus. Dom. Soto, Fachinæus & alii. Sola Dn. Vulceii & Bodini sententia vera est. Principem, ex lege Imperii, legibus à se latis, etiam hodie, solutum esse.

IX.

Statuta interpretationem recipere, affirmat Corasius. Negant Gail, Ale. & Dd. comm. Corasii sententia juri & rationi cōsentit.

X.

A. civitatibus superiorem recognoscentibus sine superioris cōsensu statuta condi posse, putant Bolog. Schn. Coler. Alb. de Rosate, Seb. Med. & alii: Quibus cōtradicit Bartolus: Quem sequor.

XI.

Servitus, de qua in personarū jure agitur, nihil aliud est, quàm dominium servorum: eodemq; sensu dōminica potestas dicitur: & in totum naturali juri contraria non est.

XII.

Legatus Proconsulis propriam jurisdictionem habet. Mirum ergò non est, si actus legitimus, si manumissio, si tutoris datio, suo ipsi jure competat.

XIII.

Jurisdictionem simplicem legibus esse incognitam, multi scribunt & dicunt. Quorum sententia aliis perquam absurda merito visa est.

XIV. Null-

XIV.

Nullos homines talem in liberos potestatem habere, qualem cives Romani habent, Justinianus quodam in loco dicit, reprehensus à Bodino & Connano: quorum neuter Justiniani mentem affectus est.

XV.

Matrimonium, ex æquissima Pauli sententia, sine patris consensu non contrahitur, contractum verò non dissolvitur. Justine igitur sunt liberi ex matrimonio sine patris consensu contracto & consummato nati? Cum distinctione justos esse, affirmo.

XVI.

Tutela non est potestas.

XVII.

Sitne potestas dandi tutorem magistratui competens jurisdictionis & imperii, verus est quæstio, in utramque partem à Dd. disputata? Affirmantium sententia verissima est.

XVIII.

Tutorem ab extraneo extraneis, à patre emancipatis, à matre liberis datum in testamento, & à Prætoris confirmatum, alii dativum, alii testamentarium esse dicunt. Nemini ad stipulor.

XIX.

Antequam mater & avia ad tutelam admittatur, opus est, ex sententia VValteri, ut omnibus privilegiis specialiter utraq; renunciet. Generalis ergò renunciatio non sufficit.

XX.

Deportatione non modò civitatem sed etiam libertatē amitteri, Ravardus putat: Cui resistunt Dn. Vultejus, Duaren. Govean. Connan. & alii: quos sequor.

XXI.

Per emancipationem hodie caput minui, negat Donell. affirmat post Hott. Dn. Treutlerus: Affirmo & ego.

XXII.

Prodigo bonis interdicatur; à quo? à lege ne, an à Prætoris? Il-

Iud Donello, hoc Borcholdo, & Dd. communiter, mihi utrumq;
placet. XXIII.

An obligetur pupillus, sine distinctione explicari nequit. Ali-
ter verò, ex sententia Accursii, distinguunt Br. Ias. Rober. & alii: ali-
ter Donellus: aliter Eguin. Baro: aliter Corasius. Optima & veris-
sima est Dn. Vultei distinctio: obligari pupillū, si locupletior sit
factus, non obligari, si locupletior factus non sit.

XXIV.

Maritum ipso jure uxoris suæ Curatorem esse posse, nisi excu-
sare se malit, Donellus putat: Cujus sententiam apertissimi juris
textus refutant. XXV.

Duo vel plures ejusdem rei in solidum Domini vel possessores
esse non possunt. XXVI.

Qualibet res, etiam sacra, etiam publica, etiam privata, diver-
so respectu alicuius est, & nullius.

XXVII.

Possessionem facti esse, prolixè disputat Donellus: Verior est
Bartoli & Bartolinorum sententia, qui juris eam esse dicunt.

XXVIII.

Filiusfam. usufructuarius, colonus, maritus, emphyteuta, cre-
ditor, sequester, rem peculiarem usufructuariam, cōductam, do-
talem, emphyteuticam, oppignoratam, sequestratā, verè & pro-
priè possident. XXIX.

Aedificium solo meo impositum propria autoritate destrui
à me non posse, multis probare conatur Vaudus: sed frustra.

XXX.

Res ab hostibus captas indistinctè occupantiū fieri, Donellus
docet. Reclamat Connan. Duar. Sarmient. Cujac. & alii. Ego à
Donelli sententia non recedo.

XXXI.

Jus venandi in alieno, quale nunc apud nos est, quid sit, variè
disputant Interpretes: VVesemb. personalem, Zasius realem, Zoa-
net.

nec. jurisdictionalem servitutem esse dicit: Bruckman. regalibus
annumerat: Ego servitutem personalem innominatam definio.

XXXII.

Bonæ fidei possessor omnes fructus tam naturales quam indu-
striales, tam perceptos quam consumptos, etiam locupletior fa-
ctus, plenè suos facit: post scientiam verò omnes restituit.

XXXIII.

Idē bonæ possessor necessarias & utiles impensas deducit: vo-
luptuarias tollit. Quod in malæ fidei possessore aliter est: qui ne-
cessarias quidē impensas deducit, utiles verò & voluptuarias tol-
lit.

XXXIV.

Id quod interest damnum emergens & lucrum cessans rectè
definitur. Estq; ex vera Donelli sententia, unius tantum generis,
non triplex, ut vulgò Dd. existimant. Quodq; revera est, in certis
quidē casibus certam quantitatem vel naturam habentibus du-
pli quantitatem excedere nequit, in incertis verò iudicis arbitrio
& definitioni committitur.

XXXV.

Usuras nec divinum, nec naturale, nec gentium, nec civile, nec
Canonicum, nec novissimum Caroli jus omnimodo improbat.

XXXVI.

Servitutē usum rei alienæ definit Cujacius. Cui definitioni cō-
sequens est, omnem usum rei alienæ servitutē esse: quod probo.

XXXVII.

Servitutem habentē novi operis nunciationem competere
Coras. disputat: A quo dissentiunt Duar. Cuj. Rayard. Hottom.
Gothofr. & alii: Corasium sequor.

XXXVIII.

Neq; urbanas neq; rusticas servitudes oppignorari posse, con-
tra multos, rectissime Donello & Duareno placuit.

XXXIX.

Mortuo usufructuario perceptos saltem fructus ad heredē ejus;

F. 4. trans.

transire, pendentes verò unà cum fundo proprietarii remanere, benè contra Cujac. Hart. Pist. defendit.

XL.

Dominum rei contra perfectam & consumatam præscriptionem in integrum restitui. si rem suam præscribi nesciverit, multi contendunt: A quibus rectè Pinelus dissentit.

XLI.

Jus luendi pignoris nequidem longissimo tempore præscribi, certum est.

XLII.

An per querelam inofficiosa donationis in solidum rescindatur donatio, pro & contra disputant Interpretes? Affirmat A. Faber: Negant Schurff. VVet. Gail. Clar. Soar. & Dd. com. Quorum sententia æquior est.

XLIII.

L. si unquam s. C. de revocand. donat. singularem effi. & à Patrono perperam ad alios extendi, multis ostendit Donellus: Mihi contraria Connani, Bocerii, Cuj. Borch. & aliorum opinio magis probatur.

XLIV.

Dominium rei dotalis ad maritum regulariter pertinere, aliquot argumentis evincere conatur Bocerius: Quæ tamen omnia tanti momenti non sunt, ut à contraria sententia dimovere aliquem possint.

XLV.

Mulieres in nullo, legatæ si in quolibet testamento testes esse possunt.

XLVI.

Ob præteritionem liberorum testamentum ipso iure nullum est, etià eo casu, quo præteriti sunt liberi, quos testator mortuos esse putavit.

XLVII.

Quo iure introducta sit inofficiosi testamenti querelæ, variæ quæstionis est? Quam aliter Cujac. aliter Donell. optimè omnium Dn. Vultejus definit, dum originem ejus tam civili quàm prætorio juri attribuit.

XLVIII.

Eadem inofficiosi testamenti querelæ, ex verissima Donelli sententia,

reſtituta, ab hereditatis petitione nihil differt. Fruſtrà ergò an cumulari utraq; eodem in libello poſſit, quæritur.

XLIX.

Hereditatis petitionem, itemq; rei vindicationē tam in loco domicilii quàm in loco rei ſitæ, ipſo jure, etiam contradicēte adverſario, inſtitui poſſe, uno quaſi ore communiter hæcenus tradiderunt Interpretes: à quibus malè Donellus divortium fecit.

L.

Fruſtus rei legatæ poſt moram regulariter deberi, benè poſt Coſtalium Oeſtenius docuit.

LI.

Accreſcendi jus in verbali conjunctione locum habere, negat Cuius. negat A. Faber: Affirmant Dn. Goëddæus, Fumæus, Duar. & alii: quos ſequor. Quid de conjunctione reali? In hac verò juri accreſcendi locum eſſe, nego.

LII.

Mixtim conjunctos ab initio facere partes rectè poſt Zaſ. & Duar. Dn. Treutlero placuit.

LIII.

Jure Canonico filium fam. fideicommiſſo vel legato gravatū duas habere quartas, certum eſt. Quid de jure civili? Idem hoc etiam jure putant obtinere, Contius, Vac. à Vac. P. Gregor. Covar. & alii: Quibus ſeſe opponunt Vaud. Hott. Cuius. Donell. Gothoff. Quorum ſententiam textuum deſectus probat.

LIV.

Fratrum liberi ſine omni exceptione in capita ſuccedunt, etiam tum, quando ex uno plures, ex alio pauciores ſuperſunt.

LV.

Ex nudo pacto nulli jure civili datur actio. Quid de jure Canonico? Putant aliqui hoc jure ex quolibet pacto actionem dari: Quod ſecutus Boccerum & alios, non admitto.

LVI.

Mutuum à me petis: Ego nummos non habens rem tibi do,

G

cum

cum pacto, ut eam vendas, & pecuniam ex vendita re quasitam
mutui loco habeas: quæritur an sit mutuum? Negant A. Fab.
Connan. Cuj. Don. Pac. & Dd. comm. à quibus dissentio.

LVII.

Praferatur ne mulier ratione tacite hypothecæ creditoribus
expressam hypothecam anteriorem habētibus, difficilis est quæ-
stio? Negant VVesenb. Donell. & alii: Sed contraria Vaudi, &
Vanderani sententia verior est.

LVIII.

De crimine capitali, excepto adulterio transigere licet. De cri-
mine non capitali, excepto falso, transigere non licet.

LIX.

Dispositio l. si quis major 41. C. de transact. in terminis acci-
pienda est. Errant igitur, qui ad omnē contractum, ad transactio-
nem injuratum, ad mulierem, ad universitatem, & denique ad
transigentis heredem, eam extendunt.

LX.

Eum qui purè promissit, eo ipso die, quo facta est promissio, cō-
veniri posse, negant Schneidervinus, Gothofr. & alii: sed absque
fundamento.

LXI.

Factū promittens præstando interesse liberatur. Quod in ven-
ditore aliter est, qui præcisè rem venditam tradere compellitur.

LXII.

Solum patrem ex solâ dotis causa filiabus emancipatis utilem
actionem stipulando acquirere, contra Cuja. & Duar. benè A.
Eaber, benè Donellus disputat.

LXIII.

Stipulatione poenali priorē obligationem novari, multis per-
suasum est: à quibus rectissimè post Alciat. & Costal. Duarenus re-
cessit.

LXIV.

Mulieres beneficio Senatorum consulti Velleiani nunquam, nul-
lòq; modo & loco renunciare posse, Donellus putat: Alii renun-
ciatio-

ditionem coram iudice factam admittunt: Ego tam iudicalem
quàm extrajudicalem, modò scienter & prudenter factā, recipio.

LXV.

Fidejussor plus promittens ad summam à principali debitam
obligatur. Moraq; rei principalis ejusdem in omnem causam fi-
dejubentis obligationem auget.

LXVI.

Possit ne exceptio nō numeratæ pecuniæ post biennium à de-
bitore onus probandi in se recipiente opponi, admodum con-
troversa est quæstio? Donello neganti, & negando à communi
Dd. sententia recedenti ad stipulor.

LXVII.

Eundem esse contractum, permutationem & contractum, do-
ut des, multi existimant: Quod alii rectius non admittunt.

LXVIII.

Ante factam traditionem omne periculum rei venditæ regu-
lariter ad emptorem pertinet.

LXIX.

Beneficium l. 2. C. de resc. vend. emptori æquè ac venditori
competit: transigenti non item.

LXX.

Merces locationis in qualibet re fungibili consistit: & ob cala-
mitatem publicam fundi usum impediens jure in totum vel
pro parte remittitur: jure etiam ob immodicam ubertatē auge-
tur. Utrumq; verò in emphyteutico canone aliter est.

LXXI.

Possit ne Dominus, aperta sibi emphyteusi, propria auctori-
tate, neglecta iudicis sententia, emphyteutam expellere, difficilis
quæstio est? Affirmant Molin. Sich. Jas. & alii: Negant Corbulus,
Borch. Guido de Suzaria: quorum sententia benignior est & æ-
quior.

LXXII.

Emphyteuta expulso, quid de meliorationibus statuendū sit,
varia iudem quæstio est? Quam aliter, ex communi Dd. senten-

ula, Borcholt, aliter Fr. Sarmient. omnium optimè Molinæus definit, statuens, omnes expensas nudam ac simplicem debitæ meliorationis formam excedentes repeti ab emphyteuta posse.

LXXIII.

Ecclesiastica emphyteusi in commissum cadente, dubium nõ est, celeri satisfactione purgari moram posse. An in civili emphyteusi idem sit, inter partes hæret diffidentes? Sarmientum affirmantem sequor.

LXXIV.

Quomodo & quando in criminalibus causis Procuratori locus sit, variè definiunt Accurs. Bart. Brissón. Fachinæus & alii. Puto Dn. Vultei sententiam esse verissimam: toties in singulis tam publicis quàm privatis criminalibus causis procuratoris defensionis locum esse, quoties damnari absens potest.

LXXV.

Neq; aliud pro alio, neq; pars pro parte invito creditori rectè solvitur. Factaq; solutio ab alio invitum debitorem æquè ac volentem liberat.

LXXVI.

Possit ne ad certum diem debitum etiam ante illum discreditori invito solvi, quæritur? Affirmat Donellus: Negat cum Cujacio Borch. Donelli sententiam amplector.

LXXVII.

Compensationem quantitatis cum corpore, aut corporis cù corpore nullam esse, contra Duarenum, Costalius, Seb. Medices & Donellus rectissimè sentiunt.

LXXVIII.

Cum certum corpus nummorum designatur veluti centum, quæ in arca habeo, quantitas videtur deberi itaquam species quædam: Quæritur itaq; an hoc in casu compensationi locus sit? Locum non esse opinor.

LXXIX.

An debitor qui juravit se soluturum, objicere compensationem possit, disputant invicem Interpretes: Negat Hostiensis, negant

Canon-

Canonistæ communiter: Affirmat Bartolus: Cujus sententiam Covar. & novissimè Fachinæus sequitur: Sequor & ego.

LXXX.

Crimen læsæ majestatis cum perduellionis crimine idem nō est, & in solum Imperatorem sive eum qui statui præest, committitur: ejusq; poena etiam ad liberos, etiam ad conscios criminis, quodammodo extenditur.

LXXXI.

Stellionatus crimen famosum esse A. Faber existimat: à quo inter se dissentiendo dissentiunt Cuj. Duar. Gothof. & Pac. Sola Pacii sententia vera est.

LXXXII.

Perjuriū grave delictum esse, quilibet intelligit. Dubitatur, an certa aliqua ejus jure civili constituta sit poena? Quod rectè cōtra Robert. & Rævardum, Cujac. Donell. & Fachinæus negare videtur.

LXXXIII.

Incertum & ad torturam minimè sufficiens indicium est, sanguinis in aquam projectarum supernatio: itemq; sanguinis effluxio, quæ fit, quando ad cadaver interfecti persona criminis insinulata adducitur.

LXXXIV.

Nullæ actiones quoad formam mixtæ sunt: quoad effectum tamen & subjectum, quædam mixtæ dici possunt.

LXXXV.

Actiones præjudiciales revera personales sunt, non reales, ut perperam plurimis persuasum est.

LXXXVI.

Ex jurejurando actio indistinctè non datur, quæ verò auctori juranti datur, nova est, in factum, & sola: actione ex eadem causa, de qua juratum est, locum amplius non habente.

LXXXVII.

Olim violenta in jus vocatione uti licuit: hodie nō licet: Olim propter violentiam illam in jus vocationem sine venia in jus

G 3

voca-

vocare quasdam personas nō licuit: quod hodie similiter est mutatum: olim poenali actione in veniam negligentes constituta, quasdam personæ utebantur: hodie nemo uritur.

LXXXVII.

Minor juris Doctor procurando vel advocando latus est: queritur an danda sit ei in integrū restitutio? Dandam esse, Sarmientus & Fachinus putant: Quorum opinio aliis merito displicuit.

LXXXIX.

Actio ex contractu, in qua defuncti delictum arguitur, in solidum in heredes datur, tametsi nihil ad eos pervenerit. Idem quæ in fortiva conditione obtinet. An & in actione rerum amotarū? Ita videtur A. Fabro: cujus conjectura nova quidem est, minimè tamen, ut opinor, legibus contraria.

XC.

Prædo possessione, quam vi adeptus fuerat, dejectus est: queritur, an, ad recuperandam possessionem pristinam interdicto unde vi, experiri possit? Quod videtur.

XC.I.

Dominus gesta à falso Procuratore, etiam post latam sententiā ratificare potest: Adversus veri Procuratoris gesta verò in integrum restitutionem frustra desiderat.

XC.II.

Judiciale juramentum est, quod à iudice in causa civili vel criminali dubia, id est, semiplenè probata, etiam non petitur, cuius post conclusionem in causa, actori defertur.

XC.III.

Necessarium juramentum est, quod actor etiam nihil probas defert reo: quod quæ reus suscipere aut referre cogitur, eo casu, quo referri potest. Quid si relationi locus non sit? Delationi adhuc locus erit.

XC.IV.

Quando & quomodo in infamiam jurare liceat, aliter ex sententia glossæ Pacius, aliter Corasius, optimè omnium Donellus explicat.

Feudum

Feudum dare omnes posse, etiam mulieres, etiam minores,
etiam clericos, etiam rusticos, dummodò rerum suarum admi-
nistrationem habeant, communissima Feudistarum
ferè omnium est sententia: cui subscri-
bere non possum.

FINIS.

RECTOR ACADEMIAE MAR-
PURGENSIS, PHILIPPUS MATTHÆUS,
J. U. Doctor ac Professor omnibus & singu-
lis suæ fidei commissis.

S. P. D.



*R*aviter juxta ac verè *Vlpianus* nobilissimus ille, ut à *Mo-*
destino nominatur, legum vertex Jurisprudentiam ar-
tem sanctissimam appellat. Neg, enim aliud illa jubet,
quàm quod *Deus* omnium hominum mentibus divinitus
inseculpsit: nec quicquam prohibet, nisi quod reſta rationi,
ac communi hominum tranquillitati adverſatur. Unde qui Jurispru-
dentiam contemnit, vincula revellit non modo judiciorum, sed pacis
quoque ac utilitatis publicæ: quin sublata Jurisprudentia, ut parens ille e-
loquentiæ *Cicero* refert, nihil eſt, quare cuiquam exploratum eſſe poſſit,
quid ſuum aut quid alienum ſit. Quam ob cauſam etiam Romanorum
Imperator *Lotharius*, eius nominis ſecundus, eos, qui bonam operæ Ju-
risprudentiæ navarent, præ alijs honorari, tituloque Doſtorum ſolemniter
inſigniri voluit, ut ſic plures alios ad eandem operam ſtudio huic dandæ
invitare, eaque ratione Reipublica quàm optime conſulere poſſet. Verè e-
nim, qui præmijs merentes fraudant, ipſam virtutem è medio auferunt.
Quod expendens ampliffimus *enelytæ* huius Academiæ Senatus *Juri-*

dicus minimè committendum putavit, ut insignis & egregiè eruditus vir Andreas Scheps Boleslaviensis Silesius, petitiis Docture in Jure tam Pontificio, quàm Casarèo honoribus frandaretur: præsertim cum ex more ac statuto hujus Scholæ non solum theses, de selectis juris controversis questionibus ad disputandum propositas doctè atq; copiosè defenderit: sed in utroque etiam examine tam publico quàm privato expectationi Dominorum Professorum abundè satisfecerit. Ut ergò singularis istius eruditionis cum insigni vita integritate conjuncta fructum tandem caperes, ac plus fidei quoq; & autoritatis ad res forenses tractandas habere posses, Juris Consulti hujus Academiæ, consentientibus cæterarum Facultatum Professoribus omnibus, titulum Doctoris in ipsum crastina luce, si Deo visum fuerit, publicè conferre decreverunt. Qua de causa, omnes omnium Facultatum Professores, Doctores, Magistros & Studiosos hortamur, ut hora sexta matutina in Collegio Lani frequentes conveniant, sua præsentia inaugurationem istam solennem cohonestet, hocq; ipso testatum faciant, se gratulari Reipublicæ de tanto viro, cujus consilio ac virtute & Scholæ & Curie deinceps regi, vi.

tag, humana societas sic ita tecta conserva-

ri possit. P. P. XXII. Augusti,

Anno 1596.

